

Xojoṅ-la San Juan kjoa xi tsakó-la Jesucristo

Kjoa xi kijtseeḡ ko 'én xi kiì'nchré San Juan

¹ Jñà kjoa koi xi kitjoé-la Jesucristo nga Nainá kitsjaà-la mé-ne nga kòkò-la xita chi'nda-la jñà kjoa xi ta niṭoón okoma. Jesucristo kisikasén àkjale-la nga tsakó-la kjoa koi Juan xi chi'nda-la ma.

² Ko jè Juan tíchja kixi-né [k'e nga kiskii] ngats'ii kjoa xi kijtseeḡ ko xi kiì'nchré koni s'ín nga jè Jesucristo kiichja kixi-la jñà 'én xi kitsjaà-la Nainá.

³ Mé tà ndaà-la jè xita xi bíxkejìin xojoṅ koa jñà xi 'nchré 'én-la Nainá xi tjí't'aà xojoṅ jè, jñá kjoa xi sa kítasòn; tíkoáá mé ta ndaà-la jè xita xi síkítasòn koni tsò xojoṅ jè, nga jè nàchrjein, jyeé nchrobá machraña.

Kó tsò Juan nga síhixat'aà nga itoò naxandá-la Cristo xi títsajna ján i'nde Asia

⁴ 'An xi 'mì-na Juan, tisìhixat'aà-nò, jñò xi naxandá-la Cristo maà xi itoò i'nde títsajnaà ján nangui Asia. Jè kàtatsjá-nò kjondaà ko kjoa'nchán jè Nainá xi tíjna, jè xi tsibìjna ko jè xi kjoíí iṅgoò k'a-ne; k'oa tí's'ín kàtatsjá-nò kjondaà ko kjoa'nchán jñà inìma xi itoò ma-ne xi títsajna nguixkon jè xi tíjnasòn íxile nga tíhotíxoma;

⁵ ko jè Jesucristo k'oa tí's'ín kàtatsjá-nò kjondaà ko kjoa'nchán. Jè Cristo, jè xi nguì 'én kixi tsjá, xi ki'ndí tjòn xi jaáya-la it'aà ts'e kjoa biyaà ko jè xi otíxoma-la jñà xita skò-la xi tjin i it'aà nangui.

Cristo matsjakeè-ná nga kisìtsjeè jé-ná ìt'aà ts'e jní-là xi tsibíxteèn.

⁶ Cristo k'oaá s'ín kisìkítsajna-ná nga xítà ítjòn komaá kò nò'miì komaá nga jñá sixá-lá Nainá xi Nà'è-n-là ma Jesucristo. Jeya kàtìjna; jè kàtatíxoma kjit'aà, nítà mé nàchrjein-ne, nítà mé nó-ne. K'oa's'ín kàtama.

⁷ ¡Chítsejèn-là! Jè Cristo jyeé kjomeé f'ìi nga tínychrobájìn ifi. Ngats'ìi xítà, xkoón skoe-ne. Jñá xítà xi kisìk'en Cristo tìkooá skoe-ne. Ngats'ìi xítà naxandá xi tjín ì ìt'aà nangui skìndáyakeè-né nga 'on koma-là ìt'aà ts'e. Jon, k'oaá s'ín koma.

⁸ “An-ná xi tjìna ítjoàn skanda tàts'en-là kjoa kò nga skanda fehet'aà-ne; 'an-ná xi tjìnaa, xi tsibi-jnaa, kò xi kjoii ìjngoò k'a; tajngoó-ná xi tse nga'ño tjín-na”, tsò Nà'è-n-ná xi Nainá.

Kjoa xi tsakó-la Nainá Juan ìt'aà ts'e Cristo

⁹ 'An-ná xi mì-na Juan, xi 'ndsè xan-nò ìt'aà ts'e Cristo. Nga yaá titsajnakooá Cristo ngàsòn titsanìkjiaán kjo'in, kò ngàsòn ya nokjoà-ná ñánda tíhotíxoma Nainá kò ngàsòn tíchíkjoakò-ná ngats'ìi kjoa. 'An nga 'én-là Nainá tíchjàya kò tìbenojmí kixi-là xítà ìt'aà ts'e Cristo, k'oaá komà-ne ján kinikasén-na ya nangui jìin-ndá ñánda 'mì Patmos.

¹⁰ Jngoò nàchrjein-là Nainá, 'an, nga ya tjìnakooa Inima Tsjeè-là, ya ìjton índsiàn kì'nchrè jngoò-là 'én xi 'ño kùichjà konì jngoò chrjo xi 'ño jane,

¹¹ kitsò-na:

—'An-ná xi tjìna ítjoàn kò xi fehet'aà-ne. Chjoì jngoò xojon, tí't'eii kjoa xi tì'yi; ìkjoàn tìkasén-là naxandá-na xi itoò ì'nde títsajna ján nangui Asia,

jña naxandá xi 'mì Éfeso, Esmirna, Pérgamo, Tiatira, Sardis, Filadelfia kọ Laodicea.

¹² K'eé kisikátjifaya nga mejèn-na skoeè yá xita xi tíchja-na; kijtseè itoò candelero xi nguì kichạ oro xi ma tìya asìtì.

¹³ Ya jngoò osen-la ñánda jncha candelero xi itoò ma-ne síjnajiìn xi okji koni kji ki'ndí-la xita. Jngoò nikje kinakjá xi ndojò kji. Bijchó skanda itjòn ndsokọ. Tíkjá jngoò na'ño payọ ya isòn inima-la xi nguì oro.

¹⁴ Tsja skọ, k'oaá kjoàn koni kjoàn tsja chroba-la orrè, koni kjoàn 'nchán kjoàn. Xkon, k'oaá s'ín tsejèn koni tsà títi ni'ín.

¹⁵ Ndsokọ k'oaá kjoàn koni kichạ sinè xi 'ño ndaà ote k'e nga jye sijiìn ni'ín. Jè jta-la, k'oaá s'ín na'yà-la koni ñánda 'ño je nandá tìbixòjen-tjòn.

¹⁶ Jè tsja kixì, itoò ni'ño tjíya. Jè tso'ba jngoò kichạ ndojò bitjo xi 'ño yijò kji ingajò ngobà. Isén-la k'oaá kji koni kji ts'oi k'e nga 'ño matsjè ndobá, 'ño ote kji.

¹⁷ K'e nga kijtseè, kiskaànguia ingui ndsokọ koni jngoò mik'en. Ikjoàn jè tsakájnason-na tsja kixì, kitsò-na:

—Kì tsakjoòn-jèn, 'an-ná xi tìjna ítjoàn kọ xi fehet'aà-ne,

¹⁸ kọ tìjnakon-ná. Tsakátijna k'en-ná tanga i'ndeì tìjnakon-ná nita mé nachrjein, nita mé nó-ne. 'An tjíya ndsaa ibi ts'e kjoabiyaà ya i'nde-la mik'en. [Tjì'ndeé-na nga skíx'aa kọ kichjoà nga siikjaáya-la.]

¹⁹ Chjí jña kjoa xi jye kà'yi kọ kjoa xi tíma nachrjein i'ndeì kọ kjoa xi koma nga koma iskan.

²⁰ Kíí tsò-ne jè kjoa'ma xi kà'yi ts'e ni'ño xi itoò ma-ne xi tjíya ndsaa kixì kọ xi itoò candelero xi

ngui kichà oro. Jñà ni'ño xi itoò ma, jñà àkjale-la naxandá-na xi itoò i'nde títsajna; kò jñà candelero xi itoò ma-ne, jñà-né xi naxandá-na xi itoò i'nde títsajna.

2

Kjoa xi kisinè-la naxandá-la Cristo ján Éfeso

¹ Chjí jngoò-la xojon jè àkjale-la naxandá-na xi tíjna ján Éfeso: “Kíí tsò jè xi itoò ni'ño tjíya tsja kixi, jè xi tsóhojiin osen-la jñà candelero xi itoò ma-ne xi ngui kichà oro, tsò-né:

² Tibe-ná xá-nò, 'ño títsanìxá kò nga mìkìi bi-jta-nò. Tíkooá tibe-ná nga mì tì kùì chíkjoako-nò jñà xitá xi ch'o s'ín. Tíkooá tibe-ná nga jyeé kichìt'aà jñà xitá xi tsò-la yijo-la nga Cristo tsibíxáya-la, tanga mìtsà kixi kjoa. Jyeé ki'yaà nga xitá ndiso-né.

³ Kjit'aà nachrjein 'ño tse kjo'in títsanìkjoón, kò 'ño títsanìxá xi kjoa ts'an. Mìkìi bijta-nò.

⁴ Tanga tjín jngoò-nò kjoa xi ch'o tjín xi mìkìi sasén-na nga mì tì k'ooá s'ín tjín-nò kjotjòcha koni nga sa ítjòn.

⁵ Jñò, tikítsjeèn kó ki'nè nga sa ítjòn k'e nga k'j'èè jé bixòjñò. Tikájno jé-nò. Íjngoò k'a Nainá tanguít'aà-là. K'ooá s'ín t'een koni ki'nè nga sa ítjòn. Tsà majìn-nò, 'an kjián nga tsjaà-nò kjo'in kò kjoaáxìn-nò ni'ín candelero-nò ya i'nde ñánda síjna.

⁶ Tanga tjín kjoa xi ndaà titsa'nè nga majticha kjoa xi s'ín jñà xitá nicolaítas. 'An, tíkooá majtike-ná.

7 Ndaà tìná'yaà koni tsò Inimà Tsjeè-là Nainá nga tíhja-là naxandá-na. Jñà xi sìikijne, 'aán tsjaà-là nga skine jñà toò-là jè yá xi síkíjnakon-ná xi síjna ya ì'nde-là Nainá ñánda 'ñó ndaà choòn."

Kjoa xi kisinè-là naxandá-là Cristo ján Esmirna

8 'Chjí jngoò-là xojon jè àkjale-là naxandá-na xi tíjna ján Esmirna: "Kíí tsò jè xi tsibìjna ítòn kò xi fehet'aà-ne, jè xi k'en kò jaáya-là, tsò-né:

9 'An be-ná xá-nò kò kjo'in xi titsanìkjioón kò nga xità ima 'mì-nò (tanga ít'aà ts'e Nainá, xità nchiná-nó jñò). Be-ná nga ch'oó chjajno-nò jñà xità xi tsò nga xità judío-né tanga mìtsà kixi kjoa nga xità judío. Jñà xità koi, yaá chja-ne ya ni'ya ñánda maxkóya xità-là xità neíí.

10 Kì tsakjoòn-jèn jè kjo'in xi síkjioón, jè xità neíí skinìs'en-nò ndayá mé-ne nga skót'aà-nò kjoa xi mokjeín-nò; te nachrjein s'e-nò kjo'in. 'Ñó t'è-là takòn kóni skanda k'e nga kiyá. Kò 'aán tsjaà-nò jè kjoabinachon xi mìkii fehet'aà koni jngoò corona.

11 Ndaà tìná'yaà koni tsò Inimà Tsjeè-là Nainá nga tíhja-là naxandá-na. Jñà xi sìikijne, nímé kjoa xi komat'in ít'aà ts'e kjoabiyaà xi ma-ne jò k'a."

Kjoa xi kisinè-là naxandá-là Cristo ján Pégamo

12 'Chjí jngoò-là xojon jè àkjale-là naxandá-na xi tíjna ján Pégamo: "Kíí tsò jè xi tjín-là kichà ndojò xi yijò kji nga ingajò ngobà, tsò-né:

13 'An tìbe-ná xá-nò, tìbe-ná nga yaá titsajnaà ñánda tíhotíxoma xità neíí. Tanga be-ná nga kixi titsajnaà; mìkii nìchàajioòn ít'aà ts'an. Tíkò be-ná nga mìkii bì'ma koni s'ín mokjeín-nò ít'aà ts'an, nas'ín k'e nga k'en Antipas, xità xi kixi bénojímí xi

it'aà ts'an; nga yaá k'en ijìin naxandá-nò ya ñánda síxá xitá nei.

¹⁴ Tanga tjin i'nga kjoa xi mikiì sasén-na nga ch'o titsa'nè, nga yaá títsajnajìin-nò xitá xi mokjeiín-la koni s'ín tsakóya Balaam kjòtseé nga chinchá'a Balac nga mejèn-la kohótsji jé jñà xitá Israel nga kàtakine tsojmì xi xkósòn kisinchaàt'aà-la; tikoá kàtas'ín kjoachijngui.

¹⁵ Tikoáá títsajnajìin i'nga-nò xitá xi mokjeiín-la koni s'ín okóya jñá xitá nicolaítas. Jñà xitá koi, 'an majtike-ná.

¹⁶ K'oaá ma-ne tikájno jé-nò, kì tì jé binchaàtsji-nò. Tsà mì k'oa s'een, nitoón kjián nga skaàn-koaa xitá koi. Jè sikjeén kichá ndojò xi bitjo-ne ndsoba.

¹⁷ Ndaà tiná'yaà koni tsò Inima Tsjeè-la Nainá nga tíchja-la naxandá-na. Jñà xi sùikijne, 'aán ts-jaà-la tsojmì xi skine xi 'mì maná xi 'an tjí'ma-na; tikoá tsjaà jngoò-la ndí ndajo jtobá xi chroba kji; yaá tjít'aà 'ín xitse xi mì yá beèxkon; tà jè skoexkon xi tjoé-la.”

Kjoa xi kisinè-la naxandá-la Cristo ján Tiatira

¹⁸ 'Chjí jngoò-la xojon jè àkjale-la naxandá-na xi tíjna ján Tiatira: “Kíí tsò jè Kí'ndí-la Nainá xi kokjoàn xkon koni ni'ín, ko jñà ndsoko, k'oaá kjoàn koni kichá sinè xi 'mì bronze xi 'ñó ndaà kjòchrja'i:

¹⁹ 'An, be-ná xá-nò ko kjoatjòcha-nò, ko kós'ín nga mokjeiín-nò koá kós'ín titsanìxá nga tíchíkjoako-nò xá xi titsa'nè. Be-ná nga jè nachrjein j'ndeì isaá ndaà titsanìxá mì k'oa-ne koni nga sa ítjòn.

20 Tanga t́jín i'nga kjoa xi mìkiì sasén-na nga ch'o títsa'nè, nga biì'nde-là jè chjoón Jezabel xi tsò-la yijo-là nga ma-là bénojmiya mé kjoa xi iskan koma nga konachan ko okóya-là xita chi'nda-na mé-ne nga kjoachijngui kátas'ín-ne tikoá kátakine tsojmì xi xkòsòn sinchát'aà-la.

21 'Aán títsja isa-là nachrjein nga kátasíkájno jé-la nga mì tì jé kohótsji-ne, tanga majin-là tsjeiin takòn kjoachijngui xi s'ín.

22 Tanga 'aán tsja-la ch'in nga 'ño tse kjo'in siikjeiin ko jña xita xi ngásòn s'ín kjoachijngui, tsà majin-là nga siikájno jé-la nga mì tì jé kohótsji-ne.

23 Jña xita xi ya fit'aà-la, jngoò k'aá sik'en. Ko ngats'ii xita naxandá-la Cristo skoe-né nga 'an-ná xi be kó tsò kjohítsjeèn-la ko inima-la jña xita. Jño, nga jngoò ìjngoò, k'oaá s'ín tsja-nò kjo'in koni t́jín kjoa xi títsa'nè.

24 Tanga jño ko xita xi i'nga xi títajna Tiatira xi mìkiì kota'yà kjohítsjeèn xi mìkiì ndaà t́jín, tikoá kj'eè kiì beè jè xi tsò-la jña xita koi kjoatjí'ma-la xita neii. Jño, k'oaá xan-nò mìtsà tì mé kjoa siijé-isa-nò.

25 Tanga jño, koni s'ín t́jín jè kjohítsjeèn ndaà xi títsa'nè, k'oaá s'ín t'een skanda k'e nga 'an kjoiaa ìjngoò k'a.

26 Jña xi siikijne-là kjoa ts'e jé tikoá siikitasòn xá-na koni s'ín mejèn-na skanda k'e nga kjoehet'aà nachrjein, 'aán tsjaà-la xá nga jña kotixoma-la ngats'ii naxandá xi t́jín isò'nde.

27 Jña xita xi kotixoma, nguì koó kicha kotixoma-ne. K'oaá s'ín siixkoaya koni t́jii ni'nde.

28 Jè kjotixoma jè, t́jé-ne xi kitsjaà-na Na'èn-na. 'An tikoáá tsjaà-la jè ni'ño tse xi bitjokàtji k'e nga

tajñòya.

²⁹ Ndaà tìná'yaà koni tsò Inimà Tsjeè-là Nainá nga tíchja-là naxandá-na.”

3

Kjoa xi kisinè-là naxandá-là Cristo ján Sardis

¹ 'Chjí jngoò-là xojon jè àkjale-là naxandá-na xi tíjna ján Sardis: “Kíí tsò jè xi itoò inimà-là Nainá tíjn-là, kò itoò ma ni'ño-là: 'An be-ná kjoa xi títsa'nè; k'oaá s'ín 'ya-nò nga títsajnakon-nó tanga xi ngui kixi kjoa, títsajnak'en-nó.

² Tíkjaáya-là yijo-nò, tjì-là nga'ño kjoa xi jye mejèn tíchija. 'An, kj'eè kù be tsà ndaà títsa'nè nga nguixkon Nainá.

³ Tíkítsjeèn kjohítsjeèn xi kitjoé-nò kò xi jye ndaà kina'ya; k'oas'ín tíkitasòn. Tíkájno jé-nò, kì tì jé binchaàtsji-nò. Tsà mìkìl sikhindaa yijo-nò k'oaá s'ín kjoikjaá-nò koni s'ín xità chijé k'e nga mìkìl títsajnandaà mé hora-ne nga kjojí.

⁴ Tanga tíjn chiba-nò xità ya Sardis xi kj'eè mé jé ótsji, yaá taña kinchimakò-na nga chroba kjoàn nikje xi kókjá nga k'oaá s'ín ok'in-là.

⁵ Jña xità xi sùikijne-là kjoa ts'e jé, nikje chrobaá kjoàn xi kókjá; mìkìl sikhàaya 'ín-là ya it'aà xojon ts'e kjoabinachon. Kò k'oaá xán nga nguixkon Nainá xi Nà'èn-na ma kò nguixkon àkjale-là nga xità ts'an-ná.

⁶ Ndaà tìná'yaà koni tsò Inimà Tsjeè-là Nainá nga tíchja-là naxandá-na.”

Kjoa xi kisinè-là naxandá-là Cristo ján Filadelfia

⁷ 'Chjí jngoò-là xojon jè àkjale-là naxandá-na xi tíjna ján Filadelfia: “K'oaá tsò jè xi ngui xità tsjeè kò

xi ngui jè sobà xi xità kixì, jè xi t́ín-là ibi-là xítaxá ítjòn xi ki'mì David, jè xi ma-là ḱíx'a xòhotjoa-là ngajmii ko ñjngòò-isa xi t́í'nde-là nga kùichjoàjto; ko k'e nga jè kùichjoàjto, ñjngòò-isa xi t́í'nde-là nga skíx'ajto:

⁸ 'An be yije-ná xá-nò; chítsejèn-là, kisìkíjna osen jngòò-nò xotjoa xi t́ix'á, xi ñjngòò t́í'nde-là nga kùichjoàjto. Nga ñas'ín tà chiba nga'ñó t́ín-nò t́anga títšanìkitasòn-nó koni tsò 'én-na; mìkiì bitsajna'ma it'aà ts'an.

⁹ T́ín jngòò t́ín xità xi ya chja-ne ya ni'ya ñánda maxkóya xità-là xità neí; xità ndiso-né nga tsò nga xità judío, t́anga mìtsà kixì kjoa. Xità koi, 'aán kichjà-là nga kátjanchrobá mé-ne nga kìnchaxkó'nchit'aà-nò; k'oaá s'ín skoē-ne nga 'an, 'ñó mat-sjake-nò.

¹⁰ Koii kjoa-là nga títšanìkitasòn koni tsò 'én xi kitsjaà-nò nga kichìkjoako kjit'aà-nò ñita mé kjoa-ne, k'oaá ma-ne, 'aán kósiko-nò jè nàchrjein xi jye nchrobá machrañà nga s'e-là kjo'in nga t́jtsa isò'nde k'e nga chít'aà yije xità xi ì títajna it'aà nangui.

¹¹ Kjoii ñitòón ñjngòò k'a. Ndaà t́ikindaá ngats'ii kjondaá xi t́ín-nò koni s'ín mokjeíín-nò mé-ne nga mì yá xi kjoaá'an-nò xi jñò jye kinikijne.

¹² Jñà xi sùikijne-là ngats'ii kjoa ch'o xi t́ín isò'nde, 'aán tsja jngòò-là ì'nde ñánda kítajna nga kjit'aà nàchrjein k'oaá ngaya-là koni jngòò chrjó xi kosìngui'ñó-là ya ni'ya tsjeè-là Nainá nga skiìjnoa 'ín-là xi Nainá xan-là ko 'ín-là naxandá-là Nainá, xi Jerusalén xitse 'mì xi kjìnchrobà-ne ngajmii ñánda t́jna Nainá, t́ikoa skiìjnoa 'ín xitse xi ts'an.

¹³ Ndaà t́iná'yaà koni tsò Inìma Tsjeè-là Nainá

nga tíchja-là naxandá-na.”

Kjoa xi kisinè-là naxandá-là Cristo ján Laodicea

¹⁴ Chjí jngoò-là xojon jè àkjale-là naxandá-na xi tíjna ján Laodicea: “Kíí tsò jè xi síjngoò yije 'én-là Nainá, jè xi nguì 'én kixi tsjá, jè xi nguì jè sobà kjoakixi, jè xi tsibíts'ia ngats'ii xi tsibíndaà Nainá. K'oaá tsò:

¹⁵ 'An, be-ná mé kjoa xi títsa'nè; mìtsà 'nchán títsajnaà nì mìtsà tsjè títsajnaà nga mìtsà kondra títsajnako-ná kò mìtsà ndaà onguít'aà-ná. Ndaà-là tjín tsà nguì ndaà onguít'aà-ná kò tsà majìn tsà nguì kondra títsajnako-ná.

¹⁶ Tanga jñò, nga isò-nò, mìtsà 'nchán títsajnaà nì mìtsà tsjè títsajnaà, k'oaá ma-ne nga ndsoba skìhisò-na.

¹⁷ Jñò k'oaá bixón: Xità nchiná-nájen; ndaà títsajna-jen; nímé chijat'aà-najen. Tanga mìkìi 'ya nga 'ín títsajnaà; nímé xi tjín-nò; xità ima-nó; mìkìi tsejèn-nò; laká títsoò.

¹⁸ 'An, k'oaá xan-nò, 'aán tìndát'aà-ná ton oro xi ni'ín kjòtsjeè-ne mé-ne nga xità nchiná koma-nò. Tíkò 'aán tìndát'aà-ná níkje tsjeè xi chroba kjoàn mé-ne nga mì kosobà-nò nga títsajna laká yijo-nò. Tíkò tinguioò xkìi colirio jñà xkoòn mé-ne nga ndaà kotsejèn-nò.

¹⁹ Ngats'ii xità xi 'an matsjake, otìko-ná tíkò tsjaà-là kjo'in. Mochjeén-né nga tjiì-là nga'ño yijo-nò; tìkájno jé-nò, kì tì jé binchaàtsji-nò.

²⁰ 'An, yaá tijnajtoa xotjoa ni'ya nga tíchjà; tsà tjín i'nga xi kji'nchré-na, koa tsà skíx'a xotjoa ni'ya-là, komaá kjoahas'en nga kókjen-koa, tíkò jè, kókjen-ko-na.

21 Jñà xi s̀ìkijne tsjaà'nde-la nga ya k̀itsajnat'aà-na ñánda t́jna íxile ts'e k̀jotíxoma-na koni s'ín 'an jye kisikijne nga yaá t́jnat'aà-la Na'èn-na ñánda t́jna íxile ts'e k̀jotíxoma-la.

22 Ndaà t́iná'yaà koni tsò Inima Tsjeè-la Nainá nga t́ichja-la naxandá-na.”

4

Kós'ín yaxkón Nainá ján ngajm̀i

1 Xi jye komà iskan, kiskoòtsejèn ján i'ngaá; k̀ijtseè ngajm̀i nga t́ix'á jngoò xotjoa ko jè jta xi k'ínchrè ítjòn-la xi koa tsò koni chrjo trompeta, kitsò-na:

—Nchrobá mijìn ijndé; kokoò-lè kjoa xi koma k'e nga jye komà yije kjoa xi tíma i'ndeí.

2 Tà ǹitoón j'ìi kanè ìjngoò k'a-na jè nga'ñó-la Inima Tsjeè-la Nainá; k̀ijtseè jngoaa íxile xi t́jna ngajm̀i ñánda t́satíxoma. Jé íxile jè, t́jna jngoò xi ya t́jnasòn.

3 Jè xi t́jnasòn íxile nga tíhotíxoma, k'oaá kji ote tsejèn koni kji ndajo chjí xi 'm̀i jaspe, o koni kji ndajo chjí xi 'm̀i cornalina. Ya indù-la íxile síjnandiì jngoò-la ijñe xi okji ote tsejèn koni kji ndajo chjí xi 'm̀i esmeralda.

4 Tíyaá-ne nga jngoò itjandiì-la ñánda t́jna xi t́jnasòn íxile nga tíhotíxoma, kaàn ñijòn íxile 'ncha isa ñánda t́satíxoma, t́ikoá kaàn ñijòn xita jchínga t́tsajnasòn xi nguì chroba kjoàn níkje xi kíkjá; saà corona kichá oro t́j'a sko.

5 Ya ñánda t́jna xi t́jnasòn íxile nga tíhotíxoma, bitjo ni'ín ch'on, ko ts'iin ch'on, t́ikoá na'yà-la jta xi chja; itoò ni'ín xi síhiseèn títi ya nguixkon íxile; jñà ni'ín, jñà inima tsjeè-la Nainá xi itoò ma-ne.

⁶ Ya nguixkon jè xi tijnasòn íxile nga tíhotíxoma, kijjna jngoò ndáchikon xi koni kji chítsín kji xi 'ńó ote.

Ya it'aà íxile ko ya indii-la, ñijòn ma xi títsajnakon; kóhokji ijton íts'in ko ya indso'ba, xki xi ján tjit'aà xkon.

⁷ Jè xi tjna ítjòn jña xi títsajnakon, k'oaá kji koni kjoàn xa. Xi ma-ne jò, koni kji nchraja ki'ndí kji. Xi ma-ne jàn, isén-la xitaá tjin-la. Xi ma-ne ñijòn, k'oaá kji koni kji ja xi tsó'bajin isén.

⁸ Jña xi ñijòn ma-ne xi títsajnakon nga jngoò ijngoò, joòn jngaá tjin-la. 'Nó kjin ma-ne xkon xi tjin nga jngoò itjandi-la ko iya-la. Mikii síkjáya ko naxrjein ko nitjen nga tsò:

Tsjeè-né, tsjeè-né, tsjeè-né jè Na'èn-ná xi Nainá,
xi ta jè tajngoó xi 'ńó tse nga'ńó tjin-la,
jè xi tsibijna, jè xi tjna ko jè xi kjoii ijngoò k'a-ne.

⁹ Jña xi títsajnakon nchitsjá-la kjoajeya, nchitsjá-la kjondaà, ko nchibeèxkón jè xi tijnasòn íxile jè xi tijnakon nitá kjé-ne. K'e k'oa nchis'in,

¹⁰ jña xita jchinga xi kaàn ñijòn ma-ne binchaxkó'nchi-ñiat'aà-la jè xi tijnasòn íxile tikoá beèxkón-né jè xi tijnakon nitá mé naxrjein-ne. Síkatsoò corona-la ya nguixkon jè xi tijnasòn íxile nga tsò:

¹¹ Na'èn, ok'in-lè nga ji tjoé-lè kjoajeya, nga jchaxkón-lè,

nga tsiji yije-né nga'ńó xi tjin,
nga ji tsibindiì ngats'ii tsojmi xi tjin,
nga k'oaá s'in kjomejèn-lè nga tjin yije tsojmi
ko nga kisindaà kóhotjin xi tjin.

5

Xojon xi maxkóya ko jè Orrè

¹ 'An, kìjtseè jè xi tíjnasòn íxile nga tíhotíxoma, kjinaya tsja kixi jngoò xojon xi kjixkóya xi kitjei-jno iya-la ko ngatsejèn-la ko itoò k'a tjí'ño ñánda jncha-la sello nga jngoò ìjngoò k'a.

² Kìjtseè jngoàà àkjale xi tse nga'ño tjín-la, xi 'ño kiichja nga kitsò:

—Yá xi ok'in-la nga skíx'a jè xojon koa komà-la kjoaáxin jña sello xi jncha-la.

³ Tanga nijá kisakò xi komà-la nga kiskíx'a jè xojon, ni mìkiì ma kotsejèn-la nga kot'aà kó tsò 'én xi tjí't'aà; nijngoò kisakò ján ngajmù, nijngoò kisakò ìt'aà nangui, koa nijngoò kisakò ìngui nangui.

⁴ 'An, 'ño kiskindàya nga ko ndáxkoaàn k'e nga kìjtseè nga nijngoò kjòtsji xi ok'in-la nga kiskíx'a jè xojon nga ma kot'aà kó tsò 'én xi tjí't'aà.

⁵ Jña xitá jchínga xi kaàn ñijòn ma-ne, jngoò xi kitsò-na:

—Kì chihindáya-jèn. Tíjna xi 'mì: Xa-la xitá naxandá Judá, xi tikoá 'mì: Tje-la xitaxá ítjòn David, nga jè xi jye kisikijne-la kondra-la. Jè xi ok'in-la nga skíjndaya jè xojon koa koma kjoaáxin sello-la xi itoò ma-ne.

⁶ K'eé kìjtseè jngoò Orrè nga síjna ya jngoò osen-la ñánda tíjna xi tíjnasòn íxile nga tíhotíxoma, ko ñánda títsajna jña xi ñijòn ma-ne xi títsajnakon, ko ñánda títsajna xitá jchínga xi kaàn ñijòn ma-ne. Jè Orrè, k'oaá kji koni tsà jye k'en; itoò ma nchrajá-la tikoá itoò ma xkon; jña xkon, jña

inima-la Nainá xi itoò ma-ne xi kinikasén nga tíjtsa isò'nde.

⁷ Jè Orrè, kiskoé jè xojon xi kjinaya tsja kixi jè xi tíjnasòn íxile nga tíhotíxoma.

⁸ Jè Orrè, k'e nga jye kiskoé xojon jè, jñà xi ñijòn ma-ne xi títsajnakon ko jñà xita jchínga xi kaàn ñijòn ma-ne chinchaxkó'nchi-ñiat'aà-la nga nguixkon Orrè. Ngats'ì saà ní'ño arpaá 'ya ko chít sín xi nguì oro xi tíjya chrjongó-la nainá. Jè chrjongó-la nainá jñà xi kjoa bítsi'ba-la jñà xita-la Nainá.

⁹ Kiseè jngoò sò xitse xi tsò:

Ok'ín-lè nga ngaji chjoí jè xojon, chjaàxìn sello-la nga jì kinik'en-lè, nga ko jní-lè tsibíchjítjì xita xi ya itjokàjìin-ne ngats'ì tje-la xita xi tjín isò'nde, ngats'ì 'én xi tjín isò'nde, ngats'ì naxandá xi tjín, ko ngats'ì nangui xi tjín isò'nde mé-ne nga ya kichja-ne it'aà ts'e Nainá.

¹⁰ Ko xitaxá ítjòn ki'nì ko no'miì ki'nì nga ma sùkitasòn-la Nainá, koa jñà kotìxoma i it'aà nangui.

¹¹ K'e nga kiskoòtsejèn, ki'nchrè jta-la jñà àkjale xi kjiìn jchán millón ma-ne xi nchiseè ya indii-la ñánda tíjna xi tíjnasòn íxile nga tíhotíxoma ko ya ñánda títsajna jñà xi títsajnakon ko jñà xita jchínga.

¹² 'Nó jchán nchichja nga tsò: Jè Orrè xi kinik'en, ok'ín-la nga jchaxkón nga ts'e yije-né nga'ño xi tjín, ko kjoa nchiná ko kjoa chjine, ko jè tsjá nga'ño, ndaà kàtayaxkón, jeya kàtìjna ko 'nga kàtìjna.

13 Ngats'iì xi xó kisindaà-ne xi tjín ngajmiì, xi tjín i it'aà nangui kò ya ìngui nangui, kò xi tjín ijìin ndáchikon, ki'nchrè-là nga tsò:

Jè xi tjínasòn íxile kò Orrè, 'nga kàtìtsajna;

kàtayaxkón, jeya kàtìtsajna,

kàtas'e-là nga'ńó nìtā mé nàchrjein-ne.

14 Jǎà xi ñijòn ma-ne xi títsajnakon, kitsò:

—jK'oaš'ín kàtama!

Jǎà xìtā jchínga xi kaàn ñijòn ma-ne chinchaxkó'nchi-ñiat'aà-là nga jeya kisikíjna jè xi tíjnakon nìtā mé nàchrjein-ne.

6

Sello xi itoò ma-ne

1 K'eé kijtseè jè Orrè nga jaàxìn ítjòn jngoò sello. Ikjoàn ki'nchrè jngoò-là jǎà xi ñijòn ma-ne xi títsajnakon nga kiichja. K'oaá kitsò koni ma ch'on nga one, kitsò:

—Nchroboí.

2 Kiskoòtsejèn, k'eé kijtseè jngoò kohòyo xi chroba kji; jè xi tíjnakjá-là kohòyo, kjinaya tsja jngoò arco xi mochjeén k'e nga tjín kjojchán; ikjoàn kitjoé jngoò-là corona xi si'a skò xìtā k'e nga síkijne; kii nga jye kisikijne mé-ne nga síkijne isa-ne.

3 Jè Orrè, k'e nga jaàxìn sello xi ma-ne jò, ki'nchrè-là jè xi ma-ne jò xi títsajnakon nga kitsò:

—jNchroboí!

4 Kò ìjngoò kohòyo itjo xi inì kji; jè xi tíjnakjá-là, kitjoé jngoò-là kichā ndojò xi 'ńó je kji, tìkoā kitjoé-là nga'ńó nga kàtjaàxìn kjoa'nchán xi tjín it'aà nangui mé-ne nga kàtasík'en-ne xíkín jǎà xìtā.

5 Jè Orrè, k'e nga jaàxìn sello xi ma-ne jàn, ki'nchrè-là jè xi ma-ne jàn xi títsajnakon nga kitsò:

—¡Nchroboí!

K'e nga kiskoòtsejèn, kijtseè ìjngoò kohòyo xi jmà kji; jè xi títnakjá-là kohòyo, jngoò libra tjíya tsja jè xi machibaya-ne tsojmì.

6 Ki'nchrè jngoò-là jta ya jngoò osen-là jñà xi ñijòn ma-ne xi títsajnakon nga kitsò:

—Nga jngoò nisoò trigo, jngoò nàchrjein chjì-là chjìnda tjín-ne. Kò nga jàn nisoò cebada, tikoaá jngoò nàchrjein chjì-là chjìnda tjín-ne. Kì tà nìkìts'ón-jen jè asitj kò vino.

7 Jè Orrè, k'e nga jaàxìn sello xi ma-ne ñijòn, ki'nchrè jta-là jè xi ma-ne ñijòn xi títsajnakon nga kitsò:

—¡Nchroboí!

8 Kiskoòtsejèn, kijtseè jngoàà kohòyo xi sinè kji. Jè xi títnakjá-là, Kjoabiyaà 'mì 'ín-là; ìjngoò tjingui-là xi I'nde ts'e Mik'en 'mì. Kitjóé-là kjetíxoma nga ngats'iì xitá xi tjín isò'nde, xi ñijòn xitá, jngoò kiyá xi kjoa ts'e kjojchán, kjoa ts'e kjinchrá, kjoa ts'e ch'in kò kjoa ts'e chò ts'en xi tjín jjiin ijñá sjik'en.

9 Jè Orrè, k'e nga jaàxìn sello xi ma-ne 'òn, 'an kijtseè ya ingui ímíxa tsjeè-là Nainá títsajna jñà xitá xi kinìk'en nga koií kjoa-là 'én-là Nainá, tikoa koií kjoa-là nga kixj kitsjaà 'én-là Nainá.

10 'Ñó nchichja nga tsò:

—Na'èn xi jì sabà tìhotìxomai, jì xi nguì tsjeè tijni kò nguì kjòkixj, skanda mé nàchrjein kíndaajìin-là nga k'oi-là kjo'in jñà xitá xi tjín ján isò'nde, jñà xi kisìk'en-najen.

¹¹ K'eé kits'ìi-là nikje xi chroba kjoà̀n, ki'mì-là nga kàtasíkjáya chiba nàchrjein ìsa skanda k'e nga kojngoò jǎ̀nà xi 'ndse joó ìt'aà ts'e Cristo xi tìkoà ngásòn xá-là Nainá kiyájìin-ne.

¹² Jè Orrè, k'e nga jaàxìn sello xi ma-ne joòn, kiskoòtsejèn nga j'ìi jngoò ch'ón xi 'ñó ts'a. Jè ts'oí, jmà kji komà koni nikje jmà, kò jè sá, inì kji komà koni jní.

¹³ Jǎ̀nà ni'ño xi tǎ̀in ngajmìi, chixòt'aà nangui koni ma jǎ̀nà toò ikò xkoén nga bixòngui k'e nga 'ñó 'ba tjo.

¹⁴ Jè ngajmìi, k'oaá s'ín kichijà koni jngoò xojon xi ma maxkóya; ngats'ìi jǎ̀nà nindoò kò nangui jìin-ndá xi tǎ̀in jìiin ndáchikon, jahatǎ̀iya-là ya ì'nde ñánda títǎ̀ajna.

¹⁵ Jǎ̀nà xitaxá ìtjòn xi tǎ̀in ìsò'nde, kò xitá xi 'ñó ndaá yaxkon-là, kò xitá nchǎ̀iná, kò xitá skò-là soldado, kò xitá xi tse nga'ñó tǎ̀in-là, kò xitá chǎ̀nda, kò xitá xi títǎ̀ajnandéjì nga mìtsà nei tǎ̀in-là, yaá tsibìtsajna'ma ñánda tǎ̀in nguijo kò naxi xi tǎ̀in-là nindoò.

¹⁶ Kitsò-là jǎ̀nà nindoò kò jǎ̀nà naxi:

—Tíkatsjònè-nájen yijo-nò, tǎ̀itsa'ma-nájen mé-ne nga mìkiil skoe-nájen jè xi tǎ̀inasòn íxile nga tíhotíxoma kò tìkoà kítǎ̀ajna'ma-lájen kjoajti-là kò kjo'in xi tsjá jè Orrè.

¹⁷ Nga jye ijchò nàchrjein-là Nainá kò Orrè nga kò kjoiti-là, 'ñó tse kjo'in tsjá. ¿Yá xi koma kichìkjoako-là?

7

Jǎ̀nà chǎ̀nda-là Nainá xi tǎ̀it'aà chǎ̀ba-là

¹ Xi jye komà iskan kjoa koi, 'an kijtseè ñijòn àkjale xi jncha kixi nga ñijòn chrjangui-là isò'nde xi nchibíchoàhikon-là tjo mé-ne nga mì tì kiì k'oa-ne ya isòn isò'nde ko isòn ndáchikon, tikoà nijngoò yá siíníyá-là.

² Tikoáá kijtseè ìjngoàà àkjale xi tínchrobá-ne ñánda bitjokàtji-ne ts'oi xi 'ya jngoò kicha ts'e Nainá xi tijnakon xi ma sit'aà chiba-là xita. 'Ñó kiichja-là jña àkjale xi ñijòn ma-ne xi jye kitjoé-là nga'ño nga tsjá ch'in-là isò'nde ko ndáchikon.

³ Kitsò-là:

—Kì tà chjà ch'in 'bì-lá isò'nde ko ndáchikon ko yá, skanda k'e-né nga jye sit'aà chiba-là ya tjen-là jña xi ch'inda-là Nainá.

⁴ Kì'nchrè-là kótjín ma-ne jña xita xi kisit'aà chiba-là, jngoò sindo ko ichán ñijòn jmiì ma-ne, ngats'ì tje-là xita Israel.

⁵ Jña ngats'ì tje-là xita koi xi kisit'aà chiba-là: jña tje-là Judá, tejo jmiì ma-ne. Jña tje-là Rubén, tejo jmiì ma-ne. Jña tje-là Gad, tejo jmiì ma-ne.

⁶ Jña tje-là Aser, tejo jmiì ma-ne. Jña tje-là Neftalí, tejo jmiì ma-ne. Jña tje-là Manasés, tejo jmiì ma-ne.

⁷ Jña tje-là Simeón, tejo jmiì ma-ne. Jña tje-là Leví, tejo jmiì ma-ne. Jña tje-là Isacar, tejo jmiì ma-ne.

⁸ Jña tje-là Zabulón, tejo jmiì ma-ne. Jña tje-là José, tejo jmiì ma-ne. Jña tje-là Benjamín, tejo jmiì ma-ne.

Xita xi kjín jchán ma-ne xi chroba kjoàn nikje xi ikjá

⁹ Xi jye komà, k'e nga kiskoòtsejèn, kjín jchán xita kijtseè; niyá xi maxkeya-là. Yaá títsajna xita xi ya

inchrobàjìin-ne ngats'iì nangui xi t́jín isò'nde, kò ngats'iì tje-la xita xi t́jín isò'nde, kò t́tsajna xita xi chja ngats'iì 'én xi t́jín, kò xita xi ya nchrobá-ne ngats'iì naxandá xi t́jín. Jñà xita koi, 'ncha kixi-né nga nguixkòn xi t́jnasòn íxile nga tíhotíxoma t́koo nga nguixkòn jè Orrè. Saà nikje chrobaá íkjá kò saà xkajén kjiya tsja.

¹⁰ Ngats'iì xita koi, 'ñó jchán nchichja nga tsò:
 Jè Na'èn-ná xi Nainá xi t́jnasòn íxile ñánda nga tíhotíxoma
 kò jè Orrè,
 tsachrjekàjìin-ná kjo'in.

¹¹ Ngats'iì jñà àkjale 'ncha kixi-né ya indii-la ñánda t́jna xi t́jnasòn íxile nga tíhotíxoma kò ya ñánda t́tsajna jñà xita jchínga xi kaàn ñijòn ma-ne, kò jñà xi ñijòn ma-ne xi t́tsajnakon. Chinchaxkó'nchi-ñiat'aà-la skanda it'aà nangui nga kijtseèxkón Nainá.

¹² Kitsò:

K'oaá s'ín kátama.
 Nainá 'ñó t́jín-la kjoa machikon-t'in, kò kjoa jeya,
 kò kjoa chjine,
 t́jín-la kjondaà, 'ñó 'nga t́jna, tse nga'ñó t́jín-la,
 kò t́jín-la kjotíxoma.
 K'oas'ín kátama nita mé nachrjein-ne.

¹³ K'ée kiichja jngoò-na jñà xita jchínga, kitsò:

—Jñà xita xi chroba kjoàn nikje xi íkjá, zyá xita-ne, ñánda kòf'iì-ne?

¹⁴ 'An, kixan-la:

—Ngají t́jìin-lè na'èn.

Jè kitsò-na:

—Jñà xitá koi xi tsatojìn kjo'in jè nachrjein k'e nga 'ño tse kjo'in kis'e. Kisìtsjeè nikje-la nga kò jní-la Orrè-la Nainá kisìchroba-ne.

¹⁵ Koií kjoa-la nga ya títsajna-ne nguixkòn jè xi tíjnasòn íxile nga tíhotíxoma kò nachrjein kò nitjen sí's'in-la ya ingo-la. Jè xi tíjnasòn íxile yaá kíjnajiìn osen kjit'aà-la nga síikinda.

¹⁶ Mì tì kii kjinchrá síikjeiín-ne kò mì tì kii koxíndá-la. Kò mì tì kii kòkà-ne yijo-la jè ndobá-la ts'oi k'e nga 'ño matsjè.

¹⁷ Nga jè Orrè xi tíjna jngoò osen-la ñánda tíjna xi tíjnasòn íxile nga tíhotíxoma, jè síikinda koni s'ín makinda orrè; jè kjoikò ñánda tíbitjo nandá xi tíjnakon. Nainá síixìjno yije ndáxkòn jñà xitá koi.

8

Xi ma-ne itoò sello

¹ Jè Orrè, k'e nga jaàxìn jè sello xi ma-ne itoò, osen-la hora jñá kis'e ján ngajmii.

² Ikjoàn kijtseè jñà àkjale xi itoò ma-ne xi 'ncha kixi nguixkòn Nainá, jngoò chrjo trompeta kits'iì-la nga jngoò ìjngoò.

³ K'eé j'iì ìjngoò àkjale xi 'ya jngoò kichá xi ngui oro jè xi tíjya chrjongó-la Nainá. Tsasíjna kixi ya it'aà ímixa tsjeè-la Nainá, ikjoàn tse chrjongó-la Nainá kits'iì-la mé-ne nga ya kisìjngoòko-ne jè kjoa bìtsi'ba-la jñà xitá-la Nainá. Yaá tsaká ya isòn ímixa tsjeè xi ngui oro xi tíjna ya nguixkòn jè xi tíjnasòn íxile ñánda tíhotíxoma.

⁴ Jè ñi'ndi-la chrjongó-la nainá kò kjoa bìtsi'ba-la xitá-la Nainá tsijin-né ya tsja jè àkjale ya nguixkòn Nainá.

⁵ Jè àkjale kiskoé jè kicha xi tìya chrjongó-la Nainá, chinchá-ìsa xá'í xi títìsòn ya it'aà imixa tsjeè-la Nainá. Ikjoàn kisikatjen-sòn isò'nde; 'ñó kits'iin ch'on, kina'yà-la jta, ki'ya-la ni'in ch'on, ko ts'a ch'ón.

Jñà chrjo trompeta

⁶ Jñà àkjale xi itoò ma-ne ko itoò chrjo trompeta tjíma'ya tsibítsajnandaà nga sikkjindáya.

⁷ Jè àkjale xi síjna ítjòn kisikkjindáya chrjo-la. Ikjoàn ts'a jtsí ndajo ko ni'in xi tsjájiin jní; ján kisikasén it'aà nangui. Jè xi ma-ne jàn-ya-la isò'nde, jngoòya kitì; k'oa tì tjín kitì jñà yá; kitì yije xka xkoén.

⁸ Jè xi ma-ne jò àkjale kisikkjindáya chrjo-la. Ko jngoò xi okji koni jngoò nindoò xi je kji xi títi, yaá kinikatjen-jiin ndáchikon. Nga jàn-ya-la ndáchikon, jngoòya, jní komà.

⁹ Jñà cho xi tjín-ngui ndáchikon, jngoòya k'en xi ma-ne jàn-ya cho. K'oaá tis'in komà jñà chitso, jngoòya chixoña xi ma-ne jàn-ya chitso.

¹⁰ Jè xi ma-ne jàn àkjale kisikkjindáya chrjo-la. Jngoò ni'ño xi 'ño je kji xi títìjnga, kiskaàngui-ne nga-jmì. Jè ni'ño jè, jngoòya xajngá nandá kiskaàjiin xi ma-ne jàn-ya xajngá nandá ko ya ñánda títjo nandá.

¹¹ Jè 'ín-la ni'ño jè, xka tsja 'mì. Ko jè nandá, jngoòya kjòtsja, jè xi ma-ne jàn-ya nandá. Kjín jchán xita k'en nga kjòtsja nandá.

¹² Jè xi ma-ne ñijòn àkjale kisikkjindáya chrjo-la. Ikjoàn jngoòya kitsi'on jè ts'oi xi ma-ne jàn-ya yijo-la; ko k'oaá tis'in komà jè sá ko ni'ño. Ikjoàn kòjñò jngoòya jè ts'oi ko sá ko ni'ño. Koá jngoòya

kòjñò jè nàchrjein xi jàn-ya tjín-ne; kò k'oaá tís'in komà k'e nga nítjen; mì tì kii kjòhiseèn-ne.

¹³ K'e nga kiskoòtsejèn, ki'nchrè jngoò-la ja xi kitoòtjen ján ijìin isén. 'Nó kiùchja nga kitsò:

—Ima xó-ne, ima xó-ne, ima xó-ne jñà xità xi tjín ján isò'nde, taxki 'oón komat'in k'e nga skindàya chrjo-la jñà àkjale xi ngui jàn chiya-isa.

9

Chrjo trompeta xi ma-ne 'òn

¹ Jè xi ma-ne 'òn àkjale kisìkjindáya chrjo-la; 'an kijtseè jngoàà ni'ño xi kiskaàngui-ne ngajmii skanda it'aà nangui. Ikjoàn kjòngatsja jè ibi ts'e nítjan.

² Kiskix'a jè nítjan. K'oaá s'in itjo ni'ndi koni tsà ts'e ngajá xi 'ño ii kjoàn. Jè ni'ndi xi itjo, kisijñò jè ts'oi kò ijìin isén.

³ Jè ni'ndi, yaá itjoiin cho langosta xi tsangason isò'nde; kits'ii-la nga'ño nga ma-la k'oee-la xità koni cho na'yá xi tjín isò'nde.

⁴ K'oaá s'in kisatiixoma-la nga mìkii tsjá ch'in-la ngats'ii xka ijñá xi tjín isò'nde, kò nijngoò yá; tà jñà xi koma tsjá ch'in-la jñà xità xi tsjìn-la chiba-la Nainá ya itjòn tjen-la.

⁵ Mìkii kitsjaà'nde-la nga siik'en xità; tà kjo'iín 'òn sá tsjá-la; jè kjo'in xi tsjá, k'oaá ngaya-la koni k'e nga 'bé-la cho na'yá xità nga ijò 'beé.

⁶ Nàchrjein koi, jñà xità mejèn-la nga kijá, tanga mìkii sakò-la kós'in siik'en yijo-la. 'Nó komejèn-la nga siik'en yijo-la tanga mìkii koma kijá.

⁷ Jñà chọ langosta k'oaá kjoà̀n isén-la koni kjoà̀n kohòyò xi binchandaà-la kjojchán. Tjísòn skò koni corona xi nguì oro; isén-la xitàá tjín-la.

⁸ Tsja skò k'oaá kjoà̀n koni kjoà̀n ts'e íchjín; nì'ño, k'oaá kjoà̀n koni ts'e xa.

⁹ Ya isòn inima-la k'oaá kjoà̀n xi kijtsa koni kicha tájaà xi síkjeén xità kjojchán; jñà jngaa-la k'oaá s'ín na'yà-la nga one koni tsà 'ño kjin ma carreta xi bíndofe kohòyò nga ongachikon nga fi kjojchán.

¹⁰ Tjín nditsin koni chọ na'yá kọ tjín-la na'yá. Jñà nditsin tjín-la nga'ño nga 'òn sá sík'ì'on xità.

¹¹ Jè xi síjna skò-la chọ langosta, jè àkjale ts'e nìtjan. Jè 'ín-la àkjale jè, xi 'én hebreo, Abadón 'mì, koa xi 'én griego, Apolión 'mì. [Jñà 'ín koi, tsòyaá-ne: jè xi síkìts'óna.]

¹² Jyeé tsato kjo'in xi tjina ítjòn xi taxki 'oón komàt'in xità; tanga nguì jò chija xi sa nchrobá.

Chrjo trompeta xi ma-ne joòn

¹³ Jè xi ma-ne joòn àkjale kiskindáya chrjo-la; k'eé kì'nchrè jngoò-la jta xi ya itjojii-ne nga ñijòn nchrajá-la jè ímixa tsjeé xi nguì oro jè xi síjna nguixkon Nainá

¹⁴ nga kitsò-la jè àkjale xi ma-ne joòn, xi kjiya chrjo tsja:

—Chjínda'ñoí jñà àkjale xi ñijòn ma-ne xi tjít'aà'ño ya chraña-la jè nandá xajngá je Éufrates.

¹⁵ K'eé kitjájnda'ño jñà àkjale xi ñijòn ma-ne xi jye k'oas'ín títsajnandaà jè hora, jè nachrjein, jè sá kọ jè nó, mé-ne nga jngoóya sík'en-ne xità xi ma-ne jàn-ya ngats'ìi xità xi tjín.

¹⁶ 'An, kì'nchrè-la kótjín ma-ne jñà xità kjojchán xi kohòyò títsajnakjá-la; jò sìndò millón ma-ne.

¹⁷ K'oaá s'ín tsatsejèn-na jǎa kohòyo kò xita xi títsajnakjá-la nga kicha tájaà kijtsa inima-la xi inì kjoàn koni ni'ín, xi azul kjoàn koni zafiro, kò xi sinè kjoàn koni azufre. Jǎa skò kohòyo, k'oaá kjoàn koni skò xa; kò ya tso'ba, ni'ín bitjo, ni'ndji bitjo, kò azufre bitjo.

¹⁸ Jè kjoa-la nga ingajàn kjo'in koi, jngoò ya k'en xita xi jàn ya ngats'ii xita xi tjín. Jè kisik'en jè ni'ín, ni'ndj kò azufre xi bitjo-ne tso'ba kohòyo.

¹⁹ Nga'ño xi tjín-la kohòyo, yaá tí'a tso'ba kò itjòn nditsin, nga jǎa nditsin k'oaá kjoàn koni kjoàn ye; koa jǎa skò síki'on-ne jǎa xita.

²⁰ Jǎa xita xi tsiningui-ne xi mikiì k'en k'e nga jye tsato yije kjo'in koi, mikiì kisikájno jé-la nga mì tí jé kohótsji-ne; takó jǎa kijtseèxkón inima ch'o-la neii, kò jǎa isén xi Nainá tsò-la xi kicha oro, plata, bronce, ndajo kò yá, jǎa xi mikiì tsejèn-la kò xi mikiì 'nchré kò xi mikiì ma fi.

²¹ Jǎa xita koi, mikiì kisikájno jé-la nga mì tí jé kohótsji-ne nga xita sík'en, nga ma-la bíndaà, kò nga kjoa chijngui s'ín, kò kjoa chijé.

10

Àkjale xi kjiya tsja jngoò xojon libro jto bá

¹ Ìjngoò àkjale kijtseè-ìsa xi tjín-la nga'ño xi tínychrobájen-ne ngajmii nga ifi tsátijno; jè skò kijnasòn jngoò ijñe; isén-la k'oaá kji koni ts'oí; jǎa ndsoko k'oaá s'ín tsejèn koni tsà ni'ín xi ncha kixi nga títi.

² Kjinaya tsja jngoò xojon xi jto bá kji xi jye kitjájndaya. Jè ndsoko kixi tsasíjnajiin ya ndáchikon kò jè ndsoko ngaskón tsasíjnasòn nangui.

3 K'oaá s'ín 'ńó kiichja koni tsò xa k'e nga kjindáya; k'e nga jye kiichja, itoò ch'on kina'yà jta-la nga tikoá kiichja.

4 K'e nga jye jane ch'on xi itoò kits'iin, 'an tijnandaà-ná nga mejèn-na skiijno jngoàà xojon, tanga ki'nchrè jngoò-la jta xi ngajmiì inchrobà-ne xi kitsò-na:

—Jñà 'én xi kàchja ch'on xi itoò kats'iin, 'maá tikíjni; kì xojoón bìt'iì.

5 Jè àkjale xi 'an kijtseè nga ya síjnajiin jngoò ndsoko ndáchikon ko xi ijngoò ndsoko ya síjnasòn nangui, kiskímiì nga tsja kixi ján ngajmiì,

6 kitsjaà 'én-la it'aà ts'e Nainá xi tijnakon nita mé nàchrjein-ne, jè xi tsibíndaà ngajmiì, nangui ko ndáchikon, ngats'iì tsojmì xi ya tjín, kitsò:

—Mì ti kii s'e isa-ne nàchrjein.

7 K'e nga kichóya nàchrjein-la nga kojits'ia jè àkjale xi ma-ne itoò nga sijkindáya chrjo-la, jè kjoa'ma-la Nainá kitasòn-né koni s'ín kitsò jñà xita chí'nda-la xi kiichja ngajo-la.

8 Jè jta xi ki'nchrè ítjòn-la xi ngajmiì inchrobà-ne, ijngoò k'a kiichja-na kitsò:

—T'in, chjoí jè xojon xi jtobá kji xi jye kitjájndaya nga kjinaya tsja jè àkjale xi síjnaxixi isòn ndáchikon ko isòn nangui.

9 Kiikoan jè àkjale, kixan-la:

—Tjiì-ná jè xojon jtobá xi kjinaya ndseji.

Kitsò-na:

—Chjoí, ikjoàn chinii; ján iya indso'boi kotsjaya-né, tanga ya i'a ndso'boi, ixii koma-lè koni tsà tsjén.

¹⁰ Kiskoé jè xojon xi kjiya tsja jè àkjale. K'e nga kiskínee, kisìhixiì'á ndsoba koni tsà tsjén; tanga ján iya indso'ba kjòtsja-né.

¹¹ Ki'mì-na:

—Mochjeén-né nga iingoò k'a kinókjayoaya ngajo-la Nainá mé kjoa xi komat'in jña xita xi kjìn naxandá nchrobá-ne ko xi kjìn nangui chja-ne ko xi kjìn skoya 'én chja, ko mé kjoa xi komat'in xitaxá ítjòn xi tjín isò'nde.

11

Jò ma xita xi tsjá 'én ít'aà ts'e Cristo

¹ K'éé kits'iì jngoò-na yá xi ma machibaya-ne, xi k'oa kji koni kjoàn yá nise. Ki'mì-na:

—Tisítjìin, tìchibayi jè ingo ítjòn-la Nainá ko jè ímìxa tsjeè-la. Tìxkeyi kótjín ma-ne jña xita xi ya beèxkón Nainá.

² Jè nditsin xi kijnat'aà-la ingo, kì kii nìchibayi nga jña kitjoé-la xi taxkì xita xi mìtsà xita judío. Jña xita koi, ichán jò sá kotìxoma ya Jerusalén xi j'nde tsjeè-la Nainá.

³ 'Aán siìkasén ingajò xita-na xi tsjá 'én ít'aà ts'an nga kichjaya jngoò jmì ko jò sìndo ko jàn-kaàn nachrjein; ko jña nikje xi kòkjá, nikje jmà kjoàn xi ts'e kjoaba.

⁴ Jña ingajò xita xi tsjá 'én, jña-né ingajò yá olivo ko ingajò kichà candelero xi jncha kixì nguìxkon Nainá xi otìxoma-la isò'nde.

⁵ Tsà yá xi mejèn-la siìki'on xita koi; ni'in kochrje tso'ba xi jngoò k'a kòkà jña xi kondra-la. K'oaá s'in kijá yije, nità yá-ne xi mejèn-la siìki'on.

⁶ Jña xita koi tjín-la nga'ño nga ma-la kùichjoà-la ngajmì mé-ne mì tjì kii k'oa-ne jtsì jña nachrjein

k'e nga kichjaya. Tikoaá tjin-la nga'ño it'aà ts'e nandá nga ma-la nga jní s'iin; ko komaá-la kjin skoya kjo'in tsjá-la xita isò'nde; komaá-la nga kos'ín s'iin nita kótjin k'a mejèn-la nga s'iin.

⁷ Ingajò xita koi, k'e nga jye tsjá 'én-la, jè cho je xi ch'o kji xi bitjomijìn-ne ya nitjan jñò, skaàn-ko-né, ko sikkijne-la, ikjoàn kiyá ingajò xita koi.

⁸ Jña yijo-la xita koi, yaá sijijò osen nditsin-la naxandá ítjòn, ñánda kisit'aà krò Na'èn-ná. Jè 'ín-la naxandá ítjòn xi okji, k'oaá s'ín ngaya-la koni Sodoma, o Egipto.

⁹ Xita xi ya inchrobàjìn-ne naxandá xi tjin isò'nde, ko ngats'ì tje-la xita xi tjin isò'nde, ko xita xi chja ngats'ì 'én xi tjin, ko xita xi ya nchrobá-ne ngats'ì nangui xi tjin isò'nde, ján nachrjein osen skótsejèn-jno yijo-la mik'en; ko mìkià tsjá'nde nga sijjìn jña xita koi xi jò ma-ne.

¹⁰ Jña xita xi tjin isò'nde kotsjaá-la nga jye k'en xita koi; tsjá kjo'tjò-la tsojmì xita xikjín. Koií k'oas'ín s'iin-ne nga jña ingajò xita xi chja ngajo-la Nainá, tseé kjo'in tsjá-la jña xita isò'nde.

¹¹ K'e nga jye tsato xi ján nachrjein osen, jè Nainá kisikítsajnakon ijngò k'a-ne nga jaáya-la; ikjoàn chinha kixi ijngò k'a-ne; ko ngats'ì xita xi kijtsee, 'ño jchán kitsakjòn.

¹² Ingajò xita koi kii'nchré jngò-la jta xi 'ño kiichja xi ngajmii inchrobà-ne, kitsò-la:

—Nchrobá-mijìn-jno ijndé.

Ikjoàn kii'mijìn-jìn ifi ján ngajmii. Ngats'ì jña xita kondra-la kijtsee-né.

¹³ Tik'eé-ne j'ii jngò ch'ón xi 'ño jchán ts'a; jn-gò ya naxandá chixoña xi ma-ne te ya kóhokji

naxandá; kò jè kjoa-là ch'ón, itoò jmiì xità k'en. Jñà xità xi tsiningui-ne, ndaà jchán kitsakjòn. Ikjoàn kiùchjat'aà-là Nainá xi tíjna ngajmiì nga jeya kisikíjna.

¹⁴ Jyeé tsato kjo'in xi ma-ne jò xi taxki 'oón komàt'in xità; tanga nchrobá nitoón xi ma-ne jàn k'a.

Chrjo trompeta xi ma-ne itoò

¹⁵ Jè xi ma-ne itoò àkjälè kisikjindáya chrjo-là; kjín jchán jta kina'yà-là ngajmiì xi 'ñó kiùchja nga kitsò:

Jñà kjotíxoma xi tjín isò'nde,

jyeé ts'e Nà'èn-ná xi otíxoma-ná kò jè Cristo xi xó kinikasén-ne.

Jè kotíxoma nità mé nachrjein-ne.

¹⁶ Jñà xità jchínga xi kaàn ñijòn ma-ne, xi títsajnanè íxile nga nguixkon Nainá, chincha-xkó'nchi-ñiat'aà-là nga kijtseèxkón Nainá.

¹⁷ Kitsò:

Nà'èn xi Nainá 'mì-lè.

Ndaà chjí-lè nga ta jí tà jngoò-né xi 'ñó tse nga'ñó tjín-lè,

ngaji xi tijni j'ndeí,

kò xi tijni skanda kjòtseé,

[kò xi sà kjoii jngoò k'a-ne].

Tì'biì-lèjen kjondaà nga jyeé kachjoí nga'ñó xi tjín-lè;

kò jyeé kòbíts'ii nga jí tìhotíxomai.

¹⁸ Jñà xità xi taxki xità xi mìtsà xità judío jyeé kòjti-là;

tanga jyeé ijchò nachrjein-là kjojti-lè k'e nga jí k'oi-là kjo'in xità koi,

jè nàchrjein k'e nga jì kíndaàjìin-la jñà xìta xi jye
 k'en
 ko k'oi-la kjotjò xi ok'in-la nga tjoé-la xìta
 chí'nda-lè xi kiichja ngajo-lè
 ko jñà xìta-la Nainá ko ngats'iì xi beèxkón-lè,
 jñà xi jtobá kjoàn ko xìta jchínga.
 Síkjesòin jñà xìta xi ma-la síkjesòin xìta
 naxandá isò'nde.

¹⁹ Ján ngajmìi kitáx'a i'nde tsjeè-la Nainá; ya
 iya i'nde tsjeè-la ki'ya-la jè kaxa ts'e kjoa xi
 tsibíndaàjìin Nainá ko jñà xìta. Ikjoàn jate ni'in
 ch'on, kina'yà-la jta, kits'iin ch'on, ts'a ch'on, ts'a
 jtsí ndajo xi 'ñó tsiaàn kjoàn.

12

Jè chjoón ko jè ye

¹ Ján ngajmìi tsatsejèn jngoò kjoxkón. Jngoò
 chjoón ki'ya-la; jè ts'oi xi ma nikje-la. Jè sá yaá tíjna
 ingui ndsoko, ko jngoò corona tjí'a sko xi tejò ni'ño
 tjít'aà.

² Jè chjoón, ki'ndí 'ya. 'Ñó jchán kjindáya nga jye
 machrañà nga jts'ín ki'ndí-la; tseé kjo'in tísíkjeiín
 nga jye ijchò chiba-la nga jts'ín ki'ndí-la.

³ Ján ngajmìi ijngoò kjoxkón tsatsejèn. Jngoò ye
 xi 'ñó je kji tsatsejèn. Inì kji, itoò ma sko, ko jngoò
 corona itsé tjí'a nga jngoò ijngoò sko. Tíkooá te ma
 nchrajá-la.

⁴ Jè nditsin ye, jngoò ya ni'ño tsibíndofe xi
 ma-ne jàn ya ngats'iì ni'ño xi tjín ngajmìi, ikjoàn
 tsibítsjot'aà nangui. Jè ye je, tsasijnat'aà-la jè chjoón
 xi tí'beé ki'ndí mé-ne nga skine-ne ki'ndí-la k'e nga
 jye jts'ín.

⁵ Jè chjoón, tsi'beé jngoò ki'ndí x'in nga jè kotìxoma-la ngats'iì naxandá xi tjin isò'nde koni jngoò xita xi yá kicha kjiya tsja nga kinè-la kjo'in xita xi mikii 'nchréñijon-la. Tanga jè ki'ndí-la chjoón, kitjá'an-la; yaá kiikò ñánda tjna Nainá nga tíhotìxoma.

⁶ Jè chjoón, tsanga-né. Ján kiì i'nde it'aà xin ñánda nangui kixi choòn, ñánda nga Nainá tsibíjnandaà jngoò-la i'nde nga ya katjiì-la tsojmì xi skine. Jngoò jmiì kò jò sindo kò jàn-kaàn nachrjein kjna.

⁷ Xi jye komà iskan, ján ngajmiì kis'e kjojchán. Jè àkjale Miguel kò àkjale-la kiskaàn-kjoòkò jè ye je. Kò jè ye je, kò àkjale-la nas'in 'ño kiskaàn-kjoò,

⁸ tanga mikii kisikijne-la, kò mì tì mé i'nde kis'e-la ján ngajmiì.

⁹ K'oaá s'in komà nga itjokàjiin ngajmiì jè ye jchínga xi 'mì Xita Neí kò xi 'mì Satanás xi konachan-la ngats'iì xita isò'nde. Kinìkatjengui ya it'aà nangui kò àkjale-la.

¹⁰ Ki'nchrè jngoò-la jta ján ngajmiì xi 'ño kiichja xi tsò:

—I'nde jyeé ijchò nachrjein nga kitjokàjiin kjo'in xita xinguiáá nga kò nga'ño-la Nainá nga jè kotìxoma kò kjotìxoma xi tjin-la Cristo [xi Nainá xó kisikasén-ne], koií kjoa-la nga jye kànikatjengui jè xi kò nachrjein kò nitjen tsját'in 'én ndiso xita xinguiáá nga nguixkon Nainá.

¹¹ Jña xita xinguiáá, nga ngui koo nga'ño xi tjin-la jni xi tsibíxteèn jè Orrè kisikijne-la kò ngui koo jña 'én xi kitsjaà it'aà ts'e Nainá. Mikii kitsakjòn-la nas'in kinik'en.

¹² Tsja kàtas'e-la ngajmiì kò jña xi ya títsajna. Tanga ima xó-nò jño xi ya titsajnaà it'aà nangui kò

xi titsajnaà ya ijìin ndáchikon nga jè xita neí jyeé ijchòjen-tjìngui-nò kò 'ńó jti tjín-la nga jyeé tjìin-la nga ta chiba nàchrjein kíjna-isa.

¹³ Jè ye xi 'ńó je kji, k'e nga kinìkatjengui it'aà nangui, tsangatjìngui-la jè chjoón xi tsi'beé ki'ndí x'in.

¹⁴ Tanga jè chjoón, jò jngaá ts'e ja kits'iì-la xi 'ńó ìi kjoàn mé-ne koma tótjen-ne nga konga-la jè ye xi je kji. Ján kii kíjna ya i'nde it'aà xìn ñánda nangui kixì choòn. Jàn nó osen kíjna nga kòkinda nga tjoé-la tsojmì xi skine.

¹⁵ Jè ye xi je kji, tsachrje nandá tso'ba nga ndána koma mé-ne nga koma kichrjoako-ne jè chjoón.

¹⁶ Tanga jè nangui kisichját'aà-la jè chjoón; kitáx'a, kits'iì ndána xi jè ye tsachrje tso'ba.

¹⁷ Jè ye isaá 'ńó kjòjtikeè jè chjoón. Kii tjìngui kondra-la jña xita tje-la chjoón nga kiikjaán-kò jña xi síkitasòn kjotíxoma-la Nainá kò jña xi ndaà tsjá 'én it'aà ts'e Cristo.

¹⁸ Jè ye, yaá tsibìjnajiin tsojmì xi 'ncha indii ndáchikon.

13

Jò cho ìi xi ch'o kjoàn

¹ Kijtseè jngoàà cho je xi ch'o kji xi itjo-mijìn-jìin-ne ndáchikon xi itoò ma skò; te ma nchrajá-la; jngoò corona itsé tí'a nga ìjngoò ìjngoò nchrajá-la; jña skò jí't'aà 'ín xi Nainá chjajno-la.

² Jè cho je xi ch'o kji xi 'an kijtseè, k'oáá kji koni kjoàn xa indo; k'oáá kjoàn ndsoko koni ts'e cho oso; k'oáá kji tso'ba koni tso'ba xa. Jè nga'ńó xi tjín-la jè ye, kò jè i'nde-la ñánda tíhotíxoma, kò jè kjotíxoma-la xi 'ńó tjín, jè cho ts'en kjòngatsja.

3 'Ñó tse kitìi jngoò sko jè cho je xi ch'o kji; k'oaá kji komà koni tsà jye kiyá; tanga jè sko xi 'ño tse kitìi, kjòndaà-ne. Ngats'ìi xìta xi tjín nga tíjtsa isò'nde, tà kjòxkón-la kjoa xi komà, ko yaá kiitjingui-la jè cho ts'en.

4 Ngats'ìi xìta kijtseèxkón jè ye, nga jè ye kits-jaà-la kjotìxoma xi tísikjeén jè cho ts'en. Jhà xìta tìkoaá kijtseèxkón jè cho je xi ch'o kji. Ikjoàn kitsò:

—Tsjìn ìjngoò isà koni jè cho je xi ch'o kji; mì yá tjín xi kichikjoa-la nga skaàn-ko.

5 Jè cho ts'en kitjò'ndeé-la nga kiichja 'én xi 'nga síkìjna yijo-la nga chjajno-la Nainá. Tìkoaá kits'ìi'nde-la nga ichán jò sá kotìxoma.

6 K'oaá s'ín kis'ìin; kiichjajno-la Nainá, kiichjajno-la 'ín-la Nainá ko Ni'ya Tsjeè-la, ko kiichjajno-la jhà xìta xi títsajna ngajmìi.

7 Tìkoa kitjò'ndeé-la nga kiskaàn-ko xìta-la Nainá skanda kó nga kisìkijne-la. Ikjoàn kits'ìi-la kjotìxoma it'aà ts'e ngats'ìi tje-la xìta, ko it'aà ts'e ngats'ìi naxandá xi tjín, ko it'aà ts'e ngats'ìi xìta xi chja ngats'ìi 'én xi tjín, ko it'aà ts'e xìta xi tjín nga ìjngoò ìjngoò nangui xi tjín isò'nde.

8 Ngats'ìi xìta xi tjín nga tíjtsa isò'nde, jè cho ts'en skoexkón, jhà ngats'ìi xìta xi mìkiì tíj't'à 'ín-la nga tisa tàts'en-la kjoa, jè xojon xi ts'e kjoabinachon xi ts'e Orrè-la Nainá xi k'en ngajo-la xìta.

9 Ndaà tiná'yaà koni xan-nò.

10 Jè xi ndayá kjis'en, k'oaá s'ín tjínè-la nga ndayá kjoì. Jè xi kichà ndojò kiyá-ne, k'oaá s'ín tjínè-la nga kichà ndojò kiyá-ne. Íi mochjeén nga kixi kítsajna kjit'aà ko nga kichikjoako-la kjo'in jhà xìta-la Nainá.

11 Xi komà iskan kijtseè ìjngoàà chò je xi ch'o kji xi itjo mijìn-ne ìjiìn nangui. Jò ma nchrajá-la xi k'oa kjoàn koni nchrajá-la orrè. K'oaá s'ín chja koni jngoò ye xi 'ño je kji.

12 K'oaá s'ín tjín-la kjotíxoma koni jè chò je xi ch'o kji xi tjna ítjòn nga ya síjna nguixkõn. Bínè-la xita xi tjín isò'nde nga kàteèkón jè chò je xi ch'o kji xi tjna ítjòn, jè xi kjòndaà-ne ñánda 'ño tse kitiì jngoò sko.

13 Tikoáá maá-la kis'iìn kjoxkón xi 'in tjín. Skanda maá-la kisikjinchrobà-jen ni'ín xi ngajmiì nchrobá-ne skanda it'aà nangui nga nguixkõn xita.

14 Kiskoònachan-la xita xi tjín isò'nde, koiì kjoa-la jña kjoxkón xi kits'ii'nde-la nga kis'iìn nguixkõn chò je xi ch'o kji xi tjna ítjòn. Tsibít'in-la xita nga kátíndaà jngoò xkósòn-la jè chò xi tjna ítjòn xi kicha ndojò kitiì-ne sko tanga jaáya-la.

15 Jè chò xi ma-ne jò kits'ii-la nga' ño nga kisikijnakon jè xkósòn-la chò xi kisindaà, mé-ne nga koma kichja-ne kò ngats'ii xita xi mikiì skoexkón sìik'en-ne.

16 K'oaá s'ín tsibínè-la nga kàtasit'aà chiba-la jña xi xita ixti, jña xita jchínga, jña xita nchiná kò jña xita ima, jña xita xi títsajnandeíj kò xi chí'nda títsajna' ño. Yaá kàtasit'aà chiba-la ya tsja kixi kò tsà ya ítjòn tjen-la.

17 Nijngoò xita xi ma kotse tsojmì, nijngoò xi ma kotijna tsà mikiì tjít'aà chiba-la kò tsà jè 'ín-la chò mikiì tjít'aà-la kò tsà mikiì tjít'aà-la número ts'e 'ín-la chò.

18 Ijndé mochjeén kjoachjine-la xita; jè xi ndaà machiya-la, kátíxkeya número-la chò je xi ch'o kji;

ts'e xìtã-né. Jè número: joòn sìndõ kõ jàn kaàn kõ joòn.

14

Jè Orrè-la Nainá kõ jñà xìtã xi jngòè sìndõ kõ ichán ñijòn jmii ma-ne

¹ Xi komà ìskan, kiskoòtsejèn, kìjtseè jè Orrè, nga síjnakixi ìsòn nindoò Sión kõ xìtã xi jngòè sìndõ kõ ichán ñijòn jmii ma-ne xi tjít'aà ìtjòn tjen-la 'ín-la Orrè kõ ts'e Nã'èñ-la.

² Ki'nchrè jngòè-la jtã xi ngajmii nchrobá-ne xi 'ñó tíhone koni ma nandá k'e nga 'ñó maje, koni ma nga faáya-la ch'on k'e nga jye ts'ìin; k'oàá s'ín ki'nchrè-la koni tsà kjìn ma xìtã xi síkjane ní'ño arpa.

³ Tína'yà jngòè-la sò xìtse nga tíjnda nguixkõn jè xi tíjnasòn ìxile nga tíhotíxoma, kõ yã nguixkõn xi ñijòn ma-ne xi títsajnakõn kõ yã nguixkõn jñà xìtã jchínga. Niyá xi ma-la seè jè sò xi tíjnda, ta jñà-né xi jngòè sìndõ kõ ichán ñijòn jmii ma-ne, jñà xi jye ìtjokàjìn kjo'in yã isò'nde.

⁴ Jñà xìtã koi, mìtsà íchjín tsibìtsajnakõ, nguì tsjeè kisijchá yijo-la. Jñà-né xi fi tjìngui-la Orrè ñita ñánda-ne nga fi. Jñà-né xi ìtjokàjìn ìtjòn kjo'in ngats'ìi ìt'aà ts'e xìtã xi tjín isò'nde, mé-ne nga koma kòngatsja ìtjòn-ne Nainá kõ Orrè.

⁵ Nímé 'én ndiso kùichja, kõ nímé jé tjín-la nga nguixkõn Nainá.

Àkjale xi jàn ma-ne

⁶ Kìjtseè ìjngoàà àkjale xi tsó'bajìn isén nga tífikõ 'én ndaà-la Nainá xi tjín ñita mé nãchrjein-ne nga keènojímí-la jñà xìtã xi títsajna isò'nde, ngats'ìi xìtã

xi tjin nga iŋgoð iŋgoð nangui, ngats'iì tje-la xita, ngats'iì xita xi chja ngats'iì 'én xi tjin, ko ngats'iì xita xi tjin nga ngats'iì naxandá xi tjin isò'nde.

⁷ Nó chja kitsò:

—Jchaxkón Nainá, jeya tikijna; jye ijchò nachrjein-la nga koindaajiin. Jchaxkón jè xi tsibindaà ngajmiì, xi tsibindaà nangui, xi tsibindaà ndáchikon ko ñánda títitjo nandá.

⁸ Iŋgoð àkjale kiichja xi kitsò:

—Jyeé kakaangui, jyeé kakaangui Babilonia, naxandá xi 'ño je kji, jè xi bit'in-la naxandá xi tjin isò'nde nga [kj'eij nainá fit'aà-la] koni s'in xita k'e nga kjoachijngui s'in. Koni s'in kis'iin, k'oaá ngaya-la koni tsà kisich'i yije xita isò'nde jè xán ts'e kjoachijngui-la xi tjiko kjojtj-la Nainá.

⁹ Iŋgoð àkjale tsatsejèn xi ma-ne jàn xi 'ño chja nga kitsò:

—Tsà yá xi skoexkón jè cho je xi ch'o kji ko isén xkósòn-la, tsà tikoa sit'aà chiba-la itjòn tjen-la, o tsà tsja,

¹⁰ Nainá tsjá-la kjo'in, k'oaá ngaya-la koni tsà vino skoí xi tjiko kjoajti-la Nainá. Nga jè sobà Nainá jyeé tsibindaà jngoð chitsín vino xi 'ño kjaán mé-ne nga kokò-ne kjoajti-la nga s'e-la kjo'in ijijn ni'in azufre xi 'ño tsjè títi. Tíkotsejèn àkjale tsjeè ko Orrè.

¹¹ Jè ni'ndi-la ts'e kjo'in-la, kjit'aá nachrjein nita kjé-ne nga kitjomijin. Mikil sijkjáya ko nachrjein ko nitjen jña xita xi jè cho ts'en ko isén xkósòn-la beèxkón, jña xi tikoa tjit'aà chiba-la ko 'ín-la jè cho je xi ch'o kji.

12 *Ijndé* nga *mochjeén* nga *kàtachíkjoa-là* *nità* mé *kjoa*-ne *jñà xità-là* *Nainá* xi *síkitasòn* *kjotíxoma-là* *kò* xi *ndaà mokjeíin-là* *it'aà* ts'e *Jesús*.

13 *Ki'nchrè* *ìjngoàà 'én* xi *ngajmii* *inchrobà*-ne xi *kitsò*-na:

—*Chjí*, *tít'eii* *xojon*: “*Jñà nàchrjein* xi *fi-ìsa*, mé *tà ndaà-là jñà xità* xi *kijá* nga *mokjeíin-là it'aà* ts'e *Nà'èn-ná*.” *K'oaá* tsò *Iníma* *Tsjeè-là* *Nainá*: “*Kixii* *kjoa*, *jñà xità* *koi sùkjáyá*-né *kjoa* ts'e *xá-là*; *ján* *ngajmii*, *jchaá-là* *ngats'ii* *kjoa* xi *ndaà kis'ìin*.”

K'e nga *maxkó* *tsojmì* xi *jye* *kòjchá* *ya it'aà* *nangui*

14 *K'e* nga *kiskoòtsejèn*, *kìjtseè* *jngoàà* *ifi* xi *chroba* *kji*, *ya isò'nga* *ifi títina* *jngòò* xi *k'oa* *kji* *koni* *ki'ndí-là* *xità*. *Jngòò* *corona* xi *nguì* *oro* *tí'a* *sko*, *kò* *jngòò* *kìchà* *libá* *kjiya* *tsja* xi 'ñó *yijò* *kji*.

15 *Ijngòò àkjalè* *itjo* *ya i'nde* *tsjeè-là* *Nainá* xi 'ñó *chja*, *kitsò-là* *jè* xi *tíjnasòn* *ifi*:

—*Tits'ii* nga *tixákoii* *kìchà* *libá-lè*; *tìchásòin*, *kò* *tíxkoí* *kóhòtjín* *tsojmì* *tjè* xi *tjín* *it'aà* *nangui* nga *jye* *kòjchá* *yije*; *kò* *jyeé* *ijchò* *nàchrjein-là* nga *sincháxkó*.

16 *Jè* xi *tíjnasòn* *ifi*, *tsibíts'ia**ko* *kìchà* *libá-là* *ya isòn* *nangui* nga *tsatesòn* *tsojmì* *tjè-là* *isò'nde*, *ìkjoàn* *chincháxkó*.

17 *Ijngòò àkjalè* *itjo* *ya i'nde* *tsjeè-là* *Nainá* xi *kijna* *ngajmii* xi *tikoa* *kìchà* *libá* *kjiya* *tsja* xi 'ñó *yijò* *kji*.

18 *Ijngòò àkjalè* *itjo*-ne *it'aà* *ímixa* *tsjeè-là* *Nainá*, *jè* xi *síkínda* *ni'ín*. 'Ñó *kiìchja-là* *jè* *àkjalè* xi *kìchà* *libá* *kjiya* *tsja*; *kitsò-là*:

—Tits'ii nga tixákoji kicha libá-lè xi 'ño yijò kji; tichát'eì 'én-la jña toò uva xi tjín it'aà nangui, nga jña toò-la jye kichji.

¹⁹ Jè àkjale tsibíts'iaḱo kicha libá-la nga tsatet'aà toò-la jña yá uva; ìkjoàn kisìkatsjoòya ya ñánda nga ma binchanè toò uva. Kjoa koi, jè okó kjoajti-la Nainá.

²⁰ Mítsa ya jjiìn naxandá kisinè jña toò uva; ján indii naxandá kisinè; k'e nga jye kisinè, jní itjo ñánda nga kisinè; 'ño tse jní itjo skanda ijchò kan-gui-la kó kji 'nga tíjna freno xi tjí'a tso'ba kohòyo ko jàn sìndò kilómetro tsangasòn.

15

Itoò ma àkjale xi itoò kjo'in j'iiko

¹ Jngoò kjoxkón kijtseè ján ngajmì xi 'ño xkón kji ko 'ño jeya ki'ya-la. Itoò ma àkjale xi itoò kjo'in j'iiko jña kjo'in xi fehet'aà-ne nga yaá fehet'aà-ne kjoajti-la Nainá.

² Tikoà kijtseè jngoàà ndáchikon xi chítsín kji; tsjájìn ko ní'ín. Ya ncha kixi isòn ndáchikon xi chítsín kji, jña xita xi jye kisikijne it'aà ts'e cho je xi ch'o kji ko isén xkósòn-la, jña xi mìkii kitsjá'nde nga kisit'aà chiba-la, ko número ts'e 'ín-la. Xita koi kjiya tsja ní'ño arpa xi Nainá kitsjaà-la.

³ Nchiseè sò-la Moisés xi chì'nda-la Nainá ko sò-la Orrè, nchitsò:

Na'èn xi Nainá 'mì-lè, xi ta ji ta jngoò-né xi 'ño tse nga'ño tjín-lè,

'ño jeya ko 'ño xkón tjín ngats'iì kjoa xi 'nì.

Xita kixi-né; kixií tjín ndiyá-lè.

Jíi-né xi Xitaxá Ítjòn tìjna-là ngats'iì naxandá xi tǵín
isò'nde.

⁴ ¿Yá xi mìkì tsakjón-lè Na'èn?

¿Yá xi mìkì skoexkón-lè?

Tajngoò ngaji xi xitá tsjì,

koií k'oas'in kjojí-ne ngats'iì naxandá-là isò'nde
nga skoexkón-lè

nga jye tí'ya-là kjoa kixi-lè.

⁵ K'e nga jye kǵtseè kjoa koi, kiskoòtsejèn nga
kitáx'a ján ngajmì jè i'nde tsjeè-là Nainá xi tǵnaya
iya Ni'ya Nikje xi okó nga ya tǵjna Nainá.

⁶ Itjo ya i'nde tsjeè-là Nainá jǵnà àkjalè xi itoò
ma-ne xi j'ìkò itoò kjo'in. Íkjá níkje lino chroba xi
'ñó ote kjoàn; tǵkjá ndáyá-là na'ñó payo xi ngui oro.

⁷ Jǵnà xi ñijòn ma-ne xi tǵtsajnakon, jngoò itjojíin
xi kisǵngatsja nga íjngó íjngó àkjalè xi itoò ma-ne;
kitsjaà íjngó íjngó-là chǵtsín xi ngui oro xi ya
tǵíya kjo'in ts'e kjoajti-là Nainá xi tǵjnakon nǵtá mé
nachrjein-ne.

⁸ Ya iya i'nde tsjeè-là Nainá, kitseè nǵ'ndǵi xi ya
inchrobà-ne it'aà ts'e kjoajeya-là Nainá ko nga'ñó
xi tǵín-là. Niyá xi kitjò'nde-là nga jahas'en ya i'nde
tsjeè-là Nainá skanda k'e nga jye tsitasòn yije jǵnà
kjo'in xi itoò ma-ne xi j'ìkò jǵnà àkjalè xi itoò ma-ne.

16

Chǵtsín xi itoò ma-ne

¹ Ki'nchrè jngoàà 'én xi ya itjo-ne i'nde tsjeè-là
Nainá nga kitsò-là jǵnà àkjalè xi itoò ma-ne:

—Tanguió, tǵtxeèn-sòn isò'nde jǵnà xi tǵíya chǵtsín
xi itoò ma-ne, kjo'in xi tǵjiko kjoajti-là Nainá.

² Kiī jè àkjalē xi tsakō ítjòn-là. Tsībixteèn-sòn isò'nde xi tjiyā chitsín-là. Ngats'ì xitā xi tjin-là chiba-là chō ts'en̄ kō xi beèxkón jè isén̄ xkósòn-là jè chō je xi ch'ō kji, tsako-là ch'in̄ xajtsé xi 'ñó ch'ō kjoàn̄ kō ijò jchán̄ ma.

³ Jè àkjalē xi ma-ne jò tsībixteèn-jiin̄ ndáchikon xi tjiyā chitsín-là. Kō jè ndáchikon, nguì jní komà, koni tsá yā k'en-jiin̄ xitā. Ngats'ì xi titsajnakon yā jiin̄ ndáchikon jngò k'aá k'en.

⁴ Jè àkjalē xi ma-ne jàn, tsībixteèn-jiin̄ yā xajngá nandá kō ñánda títbitjo nandá, jè xi tjiyā chitsín-là. Saà jní komà.

⁵ Īkjoàn̄ ki'nchrè-là jè àkjalē xi ts'e nandá, kitsò:
—Ngajī Nà'èn, tjin-lè kjoakixi, nga k'oaá s'ín kits'ì-là kjo'in̄ jñà xitā it'aà ts'e kjoā koi, nga jiī xi xitā tsjeè 'mì-lè, jiī xi tijn̄ skanda kjòtseé, tijn̄ skanda īndeì.

⁶ Nga jñà xitā koi tsībixteèn jní-là xita-lè nga jñà kisik'en, kō xitā xi kiichja-ngajo-lè. Īndeì ngajī k'oaá tìs'ín tì'biì ngajo-là jní nga nchi'biì; yaá chiba-là.

⁷ Tikōā ki'nchrè jngò-là 'én xi yā it'aà ímíxa tsjeè-là Nainá chja, nga tsò:

—Jī Nà'èn xi Nainá 'mì-lè, xi tā jī tā jngò-né xi 'ñó tse nga'ñó tjin-lè, kixí kjoa, jñà kjo'in̄ xi tí'biì-là xitā koi, ndaá tjin̄ kō nguì kixí tjin̄.

⁸ Jè àkjalē xi ma-ne ñijòn, tsībixteèn xi tjiyā chitsín-là yā isòn ts'oi. Jè ts'oi kitjò'nde-là nga jè ndobá-là kisìchjàn yijo-là xitā.

⁹ Jè ndobá-là ts'oi 'ñó kisìchjàn-là ngats'ì xitā tanga jñà xitā koi mìkìì kisìkájno jé-là nì mìkìì jeya kisikína Nainá; ta saá kiichjajno-là Nainá nga jè xi tjin-là nga'ñó it'aà ts'e kjo'in̄ koi.

10 Jè àkjale xi ma-ne 'òn, tsibíxteèn-sòn jè xi tjíya chítshín-la ya ñánda tíhotíxoma jè cho ts'en. Kò jè ì'nde ñánda tíhotíxoma jè cho je xi ch'o kji, kòjñò-né. Jña xítà xi beèxkón jè cho ts'en kiskinetjòn nijen-la nga 'ñó ijò komà-la.

11 Tanga mìkìi kisikájno jé-la; tà saá isa ndaà kiichjajno-la Nainá xi ts'e ngajmù, koi kjoa-la nga ijò komà yijo-la nga xajtsé tjín-la.

12 Jè àkjale xi ma-ne joòn tsibíxteèn-jiìn xi tjíya chítshín-la ya xajngá nandá-je Éufrates. Jè nandá-la xajngá, kixiàya-né, mé-ne nga koma kjoahato-ne jña xítaxá ítjòn xi nchrobá-ne ñánda bitjokàtji-ne ts'óí.

13 Kijtseè-ná nga jè ye xi 'ñó je kji, kò jè cho je xi ch'o kji, kò jè xítà xi kiichjaya 'én ndiso nga itjo-ne tso'ba jàn inima ch'o xi cho xke kjoàn.

14 Jña-né inima ch'o-la nejí xi s'ín kjoxkón; bitjo nga bíxkóya xítaxá ítjòn xi tjín nga tíjtsa isò'nde nga kijinchrobà kjojchán jè nachrjein xi jye tíjnda-la Nainá xi ta jè tajngoó xi 'ñó tse nga 'ñó tjín-la.

15 “Tíná'yaà, 'an, k'oaá s'ín kjoiaa koni s'ín f'ìi xítà chijé. Mé ta ndaà-la jè xítà xi tíjnda k'e nga 'an xi kjoiaa; kijjindaà nikje-la nga kòkjá; mé-ne nga mìkìi kosobà-la nga tíjna laká.”

16 Jña inima cho-la nejí tsibíxkóya xítaxá ítjòn-la isò'nde ya ì'nde ñánda 'mì Armagedón xi 'én hebreo.

17 Jè àkjale xi ma-ne itoò, tsibíxteèn jiìn isén xi tjíya chítshín-la. Kìi'nchré-la 'én xi 'ñó kiichja xi ya inchrobà-ne ì'nde tsjeè-la Nainá xi tíjna ngajmù ñánda tíjna jè xi tíjnason íxile nga tíhotíxoma; kitsò:

—Jyee tsitasòn yiye.

18 I_kjoà̀n jate ni'ín ch'ón, kina'yà-la jta, kits'iìn ch'ón, ts'a ch'ón xi 'ño jchán ts'a; ni saà jngoò k'a k'oas'ín 'ba kóni nga tisa tsatsejèn xitá isò'nde.

19 Jè naxandá je xi 'ño ndaà yaxkon-la, jàn ya komà. Kò jñà naxandá xi chja-ne nga ijngoò ijngoò nangui xi tjin isò'nde, jngoò k'aá kichjà. Kò jè naxandá je xi 'mì Babilonia xi 'ño ndaà yaxkon-la, mikiì kisìjchàajìn Nainá nga kitsjaà-la kjo'in, k'oáá ngaya-la koni kisìk'ì jngoò chitsín xi tjíya vino xi nguì kjoajti-la Nainá xi jè jye tijnandaà-la.

20 Ngats'ìi nangui xi tjin ijìn ndáchikon kò jñà nindoò, jngoò k'aá kichjà, mì tì kùì ki'ya-la.

21 Jñà xitá tsanè jtsí ndajo xi 'ño tsiaàn kjoàn, tjin-la tsà ichán kilo nga jngoò ijngoò. Jñà xitá, 'on kùìchjajno-la Nainá, koiì kjoa-la nga tse kjo'in kis'e-la kjoa ts'e jtsí ndajo.

17

Kós'in s'e-la kjo'in jè chjoón chijngui

¹ J'ìi jngoò jñà àkjale xi itòò ma-ne xi itòò chitsín tjíya tsja, kùìchja, kitsò-na:

—Nchroboí, kokoò-lè kjo'in xi tjoé-la jè chjoón chijngui xi 'ño ndaà yaxkon-la xi tijnandiì ñánda nga kjìn xajngá nandá fahato.

² Jñà xitaxá ítjòn xi tjin isò'nde, yaá tsafáhjtake chjoón jè nga kj'eíi nainá kijtseèxkón k'oáá ngaya-la tsà kjoa chijngui kisìko jè chjoón. Kò ngats'ìi xitá xi tjin isò'nde, k'oáá tì kis'iìn nga kj'eíi nainá kùitjngui-la k'oáá ngaya-la koni tsà xán ts'e kjoachijngui-la chjoón kjòch'ì-ne.

³ It'aà ts'e Inima Tsjeè-la Nainá, jè àkjale kùìko inima-na jngoò i'nde it'aà xìn ñánda nangui kixi

choòn. Kìjtseè jngoaa chjoón xi tíjnakjá-la cho je xi ch'o kji xi inì kji. Yijàjno yije yijo-la 'én xi kondra ts'e Nainá nga chjajno-la. Itoò ma sko ko te ma nchrajá-la.

⁴ Jè chjoón, nikje sko ko nikje inì kjoàn xi íkjá. Yijàjno xi nguì oro ko ndajò ote xi 'ñó ts'e chjí-la, ko ndátòn fangui xi 'ñó chjí-la xi 'mì perla. Tjíya tsja jngoò chítsín xi nguì oro; jè chítsín kitseé kjoa ch'o-la ko kjoa tjé xi ts'e kjoa chijngui-la.

⁵ Ya íjtòn tjen-la, tjít'aà 'én 'ma xi tsò: “Babilonia xi 'ñó je kji nga ndaa yaxkon-la, jè nea-la íchjín chijngui ko ngats'ìi kjoa ch'o xi tjin isò'nde.”

⁶ K'e nga kiskoò'an chjoón jè, kìjtseè xkoaàn nga ch'i-né nga jní-la xita-la Nainá kits'ìi ko ts'e xita xi kinìk'en nga 'én-la Jesús kíichjaya. K'e nga kìjtseè tà kjòxkón-na.

⁷ Kitsò-na jè àkjale:

—¿Mé-ne maxkón-lè? 'Aán, kènojímí-lè kó tsòya-ne kjoa 'ma-la chjoón jè, ko ít'aà ts'e cho je xi ch'o kji xi tíjnakjá-la xi itoò ma sko koa te ma nchrajá-la.

⁸ Jè cho xi kà'yi, tsibìjnakon-né, tanga i'ndeì tíjnak'en-né; yaá kjinchrobà mijìn-ne nitjan jñò mé-ne nga jngoò k'a chija-ne. Jñà xita xi tjin isò'nde, xi mìkiì tjít'aà 'ín-la xojòn ts'e kjoabinachon kóni nga tisa kisindaà isò'nde, tà kojxkón-la k'e nga skoexkon jè cho xi tsibìjnakon, ko i'ndeì tíjnak'en-né, tanga kotsején ijngoò k'a-ne.

⁹ 'Íjndé mochjeén kjohítsjeèn xi tjin-la kjoa chjine. Jñà sko cho xi itoò ma-ne, jñà ngayala jñà nindoò xi itoò ma-ne ñánda tíjnanè jè chjoón. Tíkoáá jñà ngayala xi itoò ma-ne xitaxá íjtòn.

10 'Òn ma-ne xi jye k'en, jngoò ma xi tíhotíxoma-Ìsa, ko jè xi ìjngoò, kj'eè kii f'ìi. Tanga k'e nga kjoíi, tà chibaá nàchrjein kotíxoma.

11 Jè cho je xi ch'o kji xi tsibìjnakon tanga ì'ndeì tíjnák'en-né, jè xi ma-ne jììn xitaxá ítjòn. Yaá tíjnajììn-là xi itoò ma-ne, ko yaá tífi ñánda nga jngoò k'a jchija.

12 Jñà nchrajá xi te ma-ne xi kà'yi, jñà ngayalà xitaxá ítjòn xi te ma-ne xi kj'eè kii tjoé-là kjotíxoma. Tanga k'e nga tjoé-là kjotíxoma ta jngoò hora kotíxomakjoò ko jè cho je xi ch'o kji.

13 Jñà xitaxá ítjòn xi te ma-ne, tajngoó kjohítsjeèn tíjín-là nga jè cho je xi ch'o kji sììngatsja nga'ño-là ko kjotíxoma-là.

14 Ikjoàn skaàn-ko jè Orrè, tanga jè Orrè sìikijne-né. Nga jè-né xi otíxoma-là jñà xita xi otíxoma, ko Xitaxá Ítjòn-laá ma jñà xi xitaxá ítjòn títsajna. Jñà xita xi títsajna, xo kinokjoà-là, xo kitjaàjììn-ne, ko kixíi síkitasòn-là.

15 Jè àkjale k'oaá ti kitsò-na:

—Jè nandá xi kà'yi, ñánda tíjnandì chjoón chijn-gui, naxandá-né, xita kjín-né, jñá-né xita xi tíjín nga ìjngoò ìjngoò nangui xi tíjín isò'nde, koa jñá-né xita xi chja ngats'ìi 'én xi tíjín isò'nde.

16 Jñà nchrajá xi te ma-ne xi kà'yi, ko jè cho je xi ch'o kji xi kà'yi, sììjtikeè-né jè chjoón chijn-gui, kjoaá'an yije-là skanda jñà nikje-là, sìikájna laká-né. Yijo-là skíne-né. Ikjoàn yaá kokájììn ni'ín.

17 Nainá k'oaá s'ín tsibíjììn kjohítsjeèn-là jñà xita koi nga k'oaá s'ín sìikitasòn koni s'ín mejèn-là Nainá. Jè kjotíxoma xi tíjín-là xita koi tíjngoò ikon nga jè cho

ts'en kòngatsja, skanda k'e nga kítasòn yije 'én xi kùichja Nainá.

¹⁸ Jè chjóón xi kà'yi, jè-né naxandá je xi otíxoma-la jñà xítaxá ítjòn xi tjín isò'nde.

18

Kós'ín kiskaàngui jè naxandá Babilonia

¹ Xi jye komà iskan, ìjngoò àkjale kítseè xi tíschrobájen-ne ngajmì, xi 'ńó tse nga'ńó tjín-la. Jè kjoa jeya-la xi 'ńó ote kji, kisihiseèn-sòn nangui.

² 'Nó kùichja, kitsò:

—Jye kiskaàngui, jye kiskaàngui naxandá je Babilonia. Jyeé ta ì'nde-la inìma ch'o-la neí komà, ya ñánda kitseè yije inìma tjé xi ch'o kjoàn. Kò ya títsajna nise xi ch'o kjoàn xi mikiì ma chine.

³ Ngats'ì xita isò'nde, k'oaá ti kis'ìin koni s'ín xita naxandá jè nga kj'eí nainá kùitjìngui-la, k'oaá ngayya-la koni tsà kjòch'i-ne jñà kjoachijngui xi kis'ìin. Jñà xítaxá ítjòn-la xi tjín nga tíjtsa isò'nde, k'oaá ti kis'ìin. Kò jñà xita isò'nde xi tsojmì otseya nga s'ín kjo'hìma, kjònchíná-né xi kjoa ts'e kjotsja-la yijo-la koni s'ín jñà xita xi tjín naxandá jè.

⁴ Ìjngoò 'én ki'nchrè xi ngajmì inchrobà-ne, xi kitsò:

—Jñò xi naxandá ts'an xan-nò, títjokàjñoò naxandá jè, mé-ne nga mì ya kòkòt'aà-nò jé-la, tíkoa mikiì kòkòt'aà-nò kjo'in xi s'e-la.

⁵ Jñà jé-la, jyeé tímakjìn, jyeé j'ìi skanda ì ngajmì. Nainá, mikiì sùjchàajìin [nga tsjá-la kjo'in] xi kjoa ts'e jé-la.

6 K'oaá t̄is'in kàtamat'in ngajo-ne koni s'in kis'iin jè. Jò k'a k'oa t̄is'in kàtamat'in ngajo-ne koni tjín kjoa xi kis'iin. Jè ch̄itsín xi kisìkáyajìin vino, kòkji t̄ikájiin ngajo-là nga jò k'a isa jchá kàtama, [jò k'a okji kjo'in kàtakò-là].

7 Jè kjoa-là nga jeya kisìkíjna yijo-là ko nga 'ñó kis'e-là kjòtsja, k'oa t̄is'in t̄jiì ngajo-là kjo'in nga kàtakjindáya. Nga k'oaá tsò inìma-là: “'An, k'oaá s'in tjina nga chjoón sko-là 'mì-na. 'An mìtsà chjoón ka'àn 'mì-na, t̄ikoaá mìkìi siikjiaán kjo'in n̄ita kjé-ne.”

8 Koíi kjoa-là nga tajngoò nàchrjein k̄itjopenè-là kjo'in: Kiyá x̄ita-là. T̄ikoaá sk̄indáya-né. S'èé-là kjoa ts'e kjinchrá. Nì'in k̄it̄i-ne nga kjoehesòn. Nga 'ñó tse nga 'ñó tjín-là jè Nainá xi otìxoma nga k'oaá s'in jye kiskoòsòn-là nga tsjá-là kjo'in.

9 J̄nà x̄itaxá ítjòn-là isò'nde 'ñó sk̄indáyakeè ko 'ñó 'on koma-là k'è nga skoè nga t̄íbitjo n̄i'ndi-là nga títi jè naxandá jè ya ñánda kiit̄jingui-là xi kj'ejí nainá k'oaá ngaya-là koni tsà jngoó chjoón chijngui kiit̄jingui-là nga kisìtsjako yijo-là.

10 Kjìin k̄incha-ne nga skótsejèn-là, nga tsakjón-là kjo'in-là. 'Ñó k̄ichja, k̄itso:

—Ima xó-ne, ima xó-ne naxandá je Babilonia xi 'ñó kis'e-là nga 'ñó; tajngoò t̄jò kòf'ìi-là kjo'in.

11 J̄nà x̄ita xi ot̄ijnaya tsojmì xi tjín isò'nde, t̄ikoaá sk̄indáyakeè-né nga 'on koma-là inìma-là nga mì t̄i yá xi kotse-ne tsojmì xi ot̄ijnaya,

12 tsojmì xi ts'e ton oro, plata, ndajo chjí xi 'ñó ndaà kjoàn, ndátòn chjí xi 'ñó ndaà kjoàn; nikje lino xi 'ñó chjí, kò nikje seda, nikje sko kò xi inì kjoàn; ngats'ìi yá xi 'ñó ndaà jnè, tsojmì chjí xi

nindaà nì'ño cho kisindaà-ne, ngats'ìi tsojmì xi yá xi 'nó chjí xi yá ikon, ko kichà bronze, ko kichà xi 'mì hierro, ko ndajo marmol,

13 ko chrjoayá canela, ngats'ìi tsojmì xi ndaà jne, chrjongó-la Nainá, ko xkiì jne xi 'mì mirra, ko chrjongó ts'e yá olivo, ko vino ko asiti. Trigo ko skoan inchrajín, ko cho ch'á, orrè, kohoyo, carreta, ko xita chì'nda nga kisatíjna.

14 Kítsò-la jè naxandá:

—Ngats'ìi kjoa xi ndaà kisaseèn-la inima-lè, jyeé kitjaàxìn yije-lè. Kjoa nchiná-lè jyeé kichija. Ko kjoa xi ndaà kòtsjachi, mì ti kiì sakò-lè nita kjé-ne.

15 Jñà xita xi otíjnaya tsojmì xi ya kjònchiná ts'e naxandá jè, kjiin kinchat'aàxìn nga tsakjón-la kjo'in. Skindáyakeè koa 'ño 'on komà-la inima-la.

16 K'oaá kítsò:

—Ima xó-ne naxandá xi 'ño je kji, xi nikje lino chjí tsakakjá ko nikje xi sko kjoàn ko xi inì kjoàn. Yijàjno yijo-la oro, ndátòn chjí xi 'mì perla ko ndajo chjí xi 'ño ndaà kjoàn.

17 Tajngoò tjò kachija yije kjoa nchiná xi tjín-la.

Ngats'ìi xita xi síxáko chitso, ko ngats'ìi xita xi ya chitso títsaya nga nchifi, jñà xi ya iya chitso síxá ko ngats'ìi xi síxájin ndáchikon, kjiin tsibìtsajna

18 k'e nga kijtseè nì'ndi-la naxandá nga títi; 'ño kiichja, kitsò:

—Nì saá jngoò naxandá tjín xi mangàsòn-kjoò koni kji naxandá jè, nga 'ño ndaà kiyaxkon-la.

19 Ikjoàn tsibíxteèn-jno chijo sko, 'ño kiskindáyakeè nga 'on komà-la inima-la; kitsò:

—Ima xó-ne naxandá xi 'ño je kji; jè kjoa nchiná-la, ndaà kjònchiná-ne jñà xita xi tjín-la

chitso ya ijìnn ndáchikon. Kò i'ndeì, ta jngoó tjo kachija yije kjoa nchiná-la.

²⁰ Ngats'ioò jño xi titsajnaà ngajmii, tsjaá t'è-là takòn. Jño xi xita-la Nainá maà, jño xi tsibíxáya-nò Cristo, kò jño xi Nainá nokjoà ngajo-là, tsja t'è-là inima-nò. Nainá jyeé kàtsjá-la kjo'in naxandá jè koií kjoa-la nga ch'o kisikò-nò.

²¹ Jngoò àkjale xi 'ño tse nga'ño tjín-la kiskoé jngoò ndajo xi koni kji ndajo natsí kji, kisikatjen-jìnn ndáchikon, kitsò:

—Jè naxandá Babilonia, xi 'ño je kji, k'oaá s'ín skajìnn-ndá; jngoó k'aá chija nita kjé-ne, mì tì yá xi skoexkon-ne.

²² Mì tì kii kiná'ya-la inchò calle-la jña música xi síkjane arpa, jña xi síkjindáya xobí, kò xi síkjane chrjo trompeta. Mì tì kii s'e-la xita xi sixá nita mé xá-ne. Tíkòa mì tì kii koxáko-ne molino ts'e ncheé.

²³ Ni'ín ts'e lámpara, mì tì kii sùhiseèn-ne; mì tì kii s'e-ne s'eí nga kixan xita; koií kjoa-la kos'ín komat'in-ne nga jña xita-la xi otseya kò otíjnaya tsojmì, 'ño xita nchiná komà i isò'nde; tíkòa kiskoònachan yije-la naxandá xi tjín isò'nde nga komà-la kis'ìnn kjoatj'e.

²⁴ Naxandá jè, Nainá kitsjaà-la kjo'in nga jè ts'e-né nga kinik'en xita-la Nainá kò xita xi kiichjaya ngajo-la Nainá kò ngats'ii xita xi kinik'en nga tíjtsa isò'nde.

19

Xita xi tsjá-la kjondaà Nainá ján ngajmii

¹ Xi jye komà iskan, ki'nchrè-la ján ngajmii 'én koni kjin jchán ma xita xi chja nga tsò:

¡Aleluya! ¡'Nga t̄ik̄ijna Nainá!
 Nga jè ochrjekàjiin-ná kjo'in kjoa ts'e jé-ná,
 ko ta jè tajngoò xi t̄jín-la kjoajeya
 ko xi tse nga'ño t̄jín-la.

² Nga jè Nainá, ndaà s'ín ko kixij s'ín
 k'e nga tsjá-la kjo'in xita;
 nga jyeé kitsjaà-la kjo'in jè naxandá je Babilonia
 xi kisikits'ón-jiin isò'nde nga tsakó-la xita isò'nde
 nga k'ejí nainá kijtseèxkón
 k'oaá ngaya-la koni jngoò chjoón xi kjoa chijngui
 s'ín.
 Koií jé xi komà-la nga jè kisik'en xita chi'nda-la
 Nainá xi kiichja ngajo-la.

³ Jngoò k'a k'oa kitsò:
 —¡Aleluya! ¡'Nga t̄ik̄ijna Nainá! Jè ni'ndi-la jè
 naxandá nga títi, k'oaá s'ín kitjomijn nita mé
 nachrjein-ne.

⁴ Jñà xita jchínga xi kaàn ñijòn ma-ne ko xi
 ñijòn ma-ne xi tútsajnakon, chincha-xkó'nchi-
 ñiat'aà-la nga kijtseèxkón Nainá xi t̄jinasòn íxile
 ñánda tíhotíxoma. Kitsò:

—¡K'oas'ín kátama! 'Nga t̄ik̄ijna Nainá. ¡Aleluya!

⁵ Ya íxile-la ñánda tíhotíxoma, kina'yà-la 'én xi
 kitsò:
 Tji-là kjondaà Nainá ngats'ioò jñò xi chi'nda maà,
 jñò xi ixti maà ko xita jchínga,
 ngats'ioò xi tsakjoòn-chaà Nainá.

⁶ Ki'nchrè-la 'én koni tsà kjín jchán ma xita xi
 chja, koni s'ín na'yà-la nandá k'e nga one, koni s'ín
 na'yà-la k'e nga one ch'on, xi kitsò:

¡Aleluya!

¡'Nga t̄ik̄ijna Nainá xi ta jè tajngoò xi 'ño tse nga'ño
 t̄jín-la!

Nga jyeé jè tíhotíxoma.

⁷ Tsja k'óé-lá in̄imá-ná, sìtsja-chaá takoán, jeya síkíjnaá Nainá,

nga jyeé j'ì kjoa bixan-là Orrè;
chjóón-là jyeé tíjnandaà.

⁸ Jè chjóón, jye ko'biì-là nikje lino xi 'ñó chjí,
xi 'ñó tsjeè kjoà̄n tikoá 'ñó ote nga kónakjá.

Jè nikje lino xi 'ñó chjí, jè ngaya-là kjoakixi xi s'ín
xita-là Nainá.

⁹ Jè àkjale kitsò-na:

—Chjí kjoa koi: “Mé ta ndaà-là jñà xita xi xó
kinokjoà-là kjoa bixan-là Orrè nga jè kòkjen-ko.”

Kitsò ìsà:

—Jñà 'én koi, nguì 'én kixi-là Nainá-né.

¹⁰ Tsohósijna xkó'nchiñia it'aà ndsokò jè àkjale
nga mejèn-na skoexkoán. Tanga jè àkjale kitsò-na:

—Kì k'oaá 'nì; 'an, tikoá chí'nda-là Nainá ma
koni ngaji kò jñà 'ndsì xi ndaà fì tjingui-là jñà 'én
kixi xi kiìchja Jesús. Jè Nainá chaxkoín.

Jñà 'én kixi xi kiìchja Jesús, tijñà-ne xi
síkítsjeèn-ya-là xita xi chja ngajo-là Nainá.

Jè xi tíjnasòn-là kohòyo chroba

¹¹ Kìjtseè ngajmì nga tìx'á; tsatsejèn jngoò
kohòyo xi chroba kji. Jè xita xi tíjnakjá-là, k'oaá
s'ín yaxkon-là nga kixi síkitasòn kò kixi tíjna, koií
kjoa-là nga nguì kò kjoakixi-là bíndaàjììn kò nga
kjaán-kjoò.

¹² Jñà xkon, k'oaá kjoà̄n koni ni'ín. Yà sko, kjín
corona jtobá tíj'a kò jngoò 'ín-là tíjt'aà xi mìkìl yá xi
machiya-là kó tsòya-ne; tajngoò jè machiya-là kó
tsòya-ne.

13 Jè nikje xi kinakjá, jní yijàjno. Jè 'ín-la, 'Én-la Nainá 'mì.

14 Yaá tjingui-la jñà soldado ts'e ngajmì nga títsajnakjá-la kohòyo chroba; saà nikje lino chrobaá íkjá xi 'ñó chjí kò tsjeè kjoàn.

15 Jè tso'ba bitjo jngoò kichà ndojò xi 'ñó yijò kji, jè xi síki'on-ne ngats'ì naxandá. Nga jè kotixoma-la xitá naxandá. Jè yá nise sikkjeén xi nguì kichà tájaà. Jè sobá kosinè jñà toò uva ya iya chitso nga kochrje vino xi okó kjoajti-la Nainá xi ta jè tajngoó xi 'ñó tse nga'ñó tjín-la.

16 Jè nikje-la kò chrjomí-la tjt'aà 'ín xi tsò: “Xitaxá Ítjòn-la ngats'ì jñà xi xitaxá ítjòn títsajna kò jè-né xi otíxoma-la ngats'ì jñà xitá xi otíxoma.”

17 Kijtseè jngoaa àkjalè xi ya síjnasòn-la ts'oi; 'ñó chja-la ngats'ì cho xi tjímajìn isén xi yijo kine. Tsò:

—Nchrobá, tixkóyaà xinguiyo mé-ne nga chjinee yijo xi Nainá tsjá-nò,

18 nga chjinee yijo-la xitaxá ítjòn, kò yijo-la xitá sko-la soldado, yijo-la xitá ts'en, yijo-la kohòyo kò yijo-la xitá xi titsakjá-la kohòyo, yijo-la ngats'ì xitá xi títsajnandejí kò xitá chi'nda kò xi ixti kò xitá jchínga.

19 Kijtseè jè cho je xi ch'o kji kò jñà xitaxá ítjòn ts'e isò'nde kò xitá soldado-la; jyeé títsajnandaà nga skaàn-kò jè xi títnakjá-la kohòyo chroba kò jñà soldado-la.

20 Jè cho je xi ch'o kji kindobà'ñó; tikoà kindobà'ñó jè xi 'én ndiso kùchja xi kis'ìin kjojkón nga nguixkon jè cho. K'oaá s'ín komà-ne nga kiskoònachan-la jñà xitá xi kiskoé chiba-la tikoà kijtseèxkón isén xkósòn-la jè cho. Ingajò

kinikatsjoèjìin tíkòn jjiìn ni'ín xi títìjnga ñánda títi kò azufre.

²¹ Jñà xita xi i'nga, jè kisik'en-ne jè kichà ndojò xi bitjo tso'ba jè xi tijnakjá-la kohòyo. Ngats'iì chò xi tìjmajiìn isén, jñà kjòskii-ne nga kiskine yijo-la xita xi jye k'en.

20

Jè xi jngoò jmiù nó

¹ Kijtseè jngoaá àkjale xi tínchrobájen-ne ngajmiù. 'Ya ibi ts'e nitjan jñò. Kjiya tsja jngoò na'ñó kichà cadena xi 'ñó je kji.

² Jè àkjale kitsobà'ñó jè ye jchínga xi tijè-ne xi 'mì Xita Neí kò xi Satanás. Jngoò jmiù nó tsibít'aà'ñó.

³ Kisikatjen-s'en ya nitjan jñò; tsibíchjoà'ñó-la jè xotjoa; ikjoàn tsasijna-la sello mé-ne nga mì yá skíx'a-ne jè xotjoa nitjan. Yaá tsasíjnahiya mé-ne nga mì tì kii koma skónachan-la xita isò'nde, skanda k'e nga kjoehet'aà xi jngoò jmiù nó. Xi koma iskan tjàjnda'ñó ijngoò k'a-ne nga koma kojmeèndeí chiba nachrjein isa.

⁴ Kijtseè íxile ts'e kjotíxoma; títsajnasòn jñà xita xi kitjoé-la kjotíxoma nga jñà koìndaàjìin. Tíkò kijtseè inima-la jñà xita xi kitiís'iìn, nga koi kjoa-la 'én kixi xi kitsjaà it'aà ts'e Jesús kò nga 'én-la Nainá kiichjaya. Jñà xita koi, mìkii kijtseèxkón jè chò je xi ch'o kji kò isén xkòsòn-la; tìkò mìkii kisit'aà chiba-la itjòn tjen-la kò tsja. Xita koi, ijngoò k'a tsibítsajnakon; jngoò jmiù nó tsatíxoma kò Cristo.

⁵ Jñà xita koi xi jaáya ítjòn-la. Tanga jñà mik'en xi i'nga, skanda k'ée jaáya-la nga ijchò jngoò jmiù nó.

6 Mé ta ndaà-la jñà xi kòkò-la nga kjoaáya ítjòn-la; xítà koi, jyeé xítà-la Nainá koma; jè kjoa biyaà xi ma-ne jò, nímé nga'ño tjin-la ít'aà ts'e xítà koi; mì tì mé ma sükò-ne. Tà saá no'miì-la Nainá koma kò ts'e Cristo. Jngoò jmiì nó kòtixomako.

7 K'e nga kjoehet'aà xi jngoò jmiì nó, tjàjnda'ño ìjngoò k'a-ne jè Satanás ya ñánda tijnahiya nitjan jño.

8 Kitjondeií-ne nga skónachan-la xítà naxandá xi tjin nga títsa isò'nde, jè Gog kò Magog. Kòixkóya xítà mé-ne nga kòits'ia-ne kjojchán. Kjin jchán koma xítà, k'oaá ngaya-la koni tsomì xi jncha indii ndáchikon.

9 Chinchimasòn kóhokji isò'nde; chinchandiì-la nga jngoò itjandiì ñánda títsajna xítà-la Nainá kò naxandá xi tsjakeè. Ikjoàn kisikasén ni'ín Nainá xi inchrobà-ne ngajmiì. Jngoò k'a tsaká kóhotjín.

10 Jè xítà neií xi kiskoònachan-la xítà, kinikatjen-jìin ya i'nde ñánda títinga ni'ín kò azufre. Jyeé ya títsajna jè cho je xi ch'o kji kò xi kùichjaya 'én ndiso. Yáá sükjeiín kjo'in kò nachrjein kò nitjen nità kjé-ne.

Jè íxile ts'e kjoítxoma xi chroba kji

11 Kijtseè jngoò íxile xi chroba kji kò 'ño je kji nga ya títnasòn jngoò xi tíhotíxoma. Nga nguixkon jè xi títnasòn íxile, jngoò k'a kichijà nangui kò ngajmiì. Nità ñánda-ne, mì tì kii ki'ya-la.

12 Kijtseè mik'en xi ixti kjoàn kò xi xítà jchinga kjoàn, 'ncha kixi nguixkon Nainá. Ikjoàn kitáx'a jñà libro [ñánda tíjt'aà mé xi kis'iìn nga jngó jngó xítà]; koà ìjngoò libro kitáx'a ñánda tíjt'aà

ts'e kjoabinachon. Jñà mik'en, k'oaá s'ín kisindaàjìin-là koni s'ín tjit'aà xojoṇ ts'e libro, mé kjoa xi kis'iin.

¹³ Jè ndáchikon kitsjaà jñà mik'en xi ya k'en-jìin. Jè kjoabiyaà ko i'nde kjo'in tikoáá kitsjaà mik'en xi ya títsajna. K'oaá s'ín kisindaàjìin-là nga jngoò lingoò xita koni tjin kjoa xi kis'iin.

¹⁴⁻¹⁵ Jè kjoabiyaà ko i'nde kjo'in kinikatsjoðjìin ñánda títi ni'ín jnga. Ko jñà mik'en xi mìkii tjit'aà 'ín-là jè libro ts'e kjoabinachon, tikoáá yaá kinikatsjoðjìin ñánda títi ni'ín jnga. Jè xi ma-ne jò kjoabiyaà.

21

Ngajmii xitse ko nangui xitse

¹ Kijtseè jngoáá ngajmii xitse ko nangui xitse. Jè ngajmii xi kisijna ítjòn ko nangui xi kisijna ítjòn, jyeé kichijà; tikoáá kichijà jè ndáchikon.

² Tikoá kijtseè jè naxandá tsjeè xi Jerusalén xitse 'mì, nga tinchrobájen ngajmii nga nguixkon Nainá. K'oaá s'ín tíjnandaà koni jngoò chjoón xi ndaà bíndaà yijo-là nga jye kixan-ko x'in-là.

³ Ki'nchrè-là 'én xi 'ñó chja, xi ngajmii inchrobà-ne, xi tsò:

—Chítsejèn-là Ni'ya Tsjeè-là Nainá, jyeé kòbitjojen; Nainá yaá kijnako jñà xita; xita naxandá-láá koma, nga jè sobà xi Nainá kitso-là.

⁴ Jè sobà Nainá sùxijno yije ndáxkon; mì tì kii s'e-ne kjoabiyaà; mì tì kii s'e-ne kjoaba; mì tì kii yá skindàya-ne; mì tì kii s'e-ne xi ijòjno ijòt'aà yijo-là, koi kjoa-là nga jye tsato kjoa jchínga.

⁵ Jè xi tíjnasòn íxile ts'e kjotíxoma, kitsò:

—Chítsejèn-la, 'aán sìixitseyaya yije tsojmì xi tjin.

I_kjoàn kitsò-na:

—Chjí, xojon tít'eii jñà 'én koi; nga ngui k'oaá s'ín tjin nga kitasòn; ngui 'én kixi-né.

⁶ I_kjoàn kitsò-na:

—Jyeé tsitasòn yije. 'An-ná xi tijná ítjoàn skanda tàts'en-la kjoa kó nga skanda fehet'aà-ne. 'An-ná xi tsibits'iaa kò xi sikjehet'aà-na kjoa. Ngats'ii xi xínda-la, 'aán tsjaà kjotjò-la nandá xi títbitjo ya i'nde ñánda mìkii xiya nandá mé-ne koma kíjnakon-ne inima-la nita ké-ne.

⁷ Jñà xi sìikijne, jñà skoé kjotjò ngats'ii kjondaà koi. 'Aán kótijnakoaa nga Nainá kitso-na kò jñà, ixti-naá koma.

⁸ Tanga jñà xita xi tsakjón, jñà xi mìkii mokjeiin-la, jñà xi 'ño ch'o s'ín, jñà xi xita sík'en, jñà xi kjoa chijngui s'ín, jñà xi xita tje, jñà xi xkósòn beèxkón, ngats'ii xi 'én ndiso chja, ján kixojiin ñánda títi ni'ín jnga kò azufre; jè xi ma-ne jò kjoabiyaà.

Naxandá xitse xi 'mì Jerusalén

⁹ J'ìikon jngoò-na àkjale jñà xi itoò ma-ne, xi tikoà itoò chitsín tjin-la, xi jncha kitseè xi itoò kjo'in xi fehet'aà-ne. Kitsò-na:

—Nchroboí, kokoò-lè jè xi koma chjoón-la Orrè.

¹⁰ It'aà ts'e Inima Tsjeè-la Nainá, jè àkjale kiko inima-na jngoò nindoò xi je kji kò nga kji. Tsakó-na jè naxandá xi je kji, naxandá tsjeè Jerusalén nga tinchrobájen-ne ngajmiì nga nguixkon Nainá.

¹¹ Jè naxandá tsjeè Jerusalén, oteé tsejèn xi kjoa ts'e kjoajeya-la Nainá. K'oaá s'ín ote kji koni ndajo

chjí xi 'ñó ndaà kjoàn, koni ndajo xi jaspe 'mì nga ote kji koni chĩtsín.

¹² Nga jngoò itjandiì, jè naxandá, chrjó ndajo tjíndiì-là xi 'ñó je kji ko 'ñó 'nga kji. Tejò xotjoa tjín-là. Nga jngoò ìjngoò xotjoa, jngoò àkjale síjnajto. Tíkóa ya tjít'aà 'ín-là nga tejò naxandá xi ya inchrobàt'aà-ne ìxti-là Israel.

¹³ Ya kixi-là ñánda bitjokàjìin-ne ts'oi, jàn xotjoa tjín-là, ya kixi-là ñánda kahatji-ne ts'oi, jàn xotjoa tjín-là. Ya norste, tíkóaá jàn xotjoa tjín-là, ya sur, tíkóaá jàn xotjoa tjín-là.

¹⁴ Jè chrjó ndajo xi tjíndiì-là naxandá, tejò chrjó ndajo xi ya tjít'aà nga tejò 'ín-là xità xi tejò ma-ne xi it'aà ts'e Orrè kisixáya-là.

¹⁵ Jè àkjale xi tíchjako-na, jngoò kicha kjinaya tsja xi nguì oro xi koni kji yá xi ma machìba-ne. Jè kisìkjeén nga ma kisìchìba naxandá ko xotjoa-là ko chrjó ndajo-là.

¹⁶ Jè naxandá k'oaá s'ín kijna nga ñijòn chrjangui tjín-là. Koni kji ndojò, k'oaá tì kji tiyà-ne. Jè àkjale, k'e nga kisìchìba, jò jmì ko jò sìndo kilómetro tjín-là. Ngásòn chìba tjín-là nga ndojò ko nga tiyà ko nga 'nga.

¹⁷ Ikjoàn kisìchìba jè chrjó ndajo. Jngoò sìndo ko ichán ñijòn xkó tsja tjín-là xi chìba-là xità xi tísìkjeén jè àkjale, [jè xi ichán nanga tjín-ne].

¹⁸ Jè chrjó ndajo xi tjíndiì-là naxandá, koií tjíndaà-ne ndajo chjí xi 'mì jaspe. Ko jè naxandá, nguì oro sobà-né. K'oaá s'ín ote kji koni chĩtsín tsjeè.

¹⁹ Jñà tàts'en chrjó xi tjíndaà-ne nga tíchjoàndiì-là naxandá, nguì ndajo chjí yijàjno xi 'ñó ndaà kjoàn.

Jè xi íjtòn, jè ndajò xi 'mì jaspe; xi ma-ne jò, ndajò xi 'mì zafiro; xi ma-ne jàn, ndajò xi 'mì ágata; xi ma-ne ñijòn, ndajò xi 'mì esmeralda;

²⁰ xi ma-ne 'òn, ndajò xi 'mì ónice; xi ma-ne joòn, ndajò xi 'mì cornalina; xi ma-ne itoò, ndajò xi 'mì crisólito; xi ma-ne jùìn, ndajò xi 'mì berilo; xi ma-ne ñijaàn, ndajò xi 'mì topacio; xi ma-ne te, ndajò xi 'mì crisoprasa; xi ma-ne tejngoò, ndajò xi 'mì jacinto; xi ma-ne tejò, ndajò xi 'mì amatista.

²¹ Jñà xotjoa xi tejò ma-ne, tejò ndajò perla tjíndaà-ne. Nga jngoò ìjngoò xotjoa jngoò perla tjíndaà-ne. Ndiyá teè-la naxandá, nguì oro sobà-né koni chítín xi ma chítsejèn-ya.

²² Ya jjiìn naxandá, nijngoò ingo kijtseè; nga jè sobà xi ma ingo-la naxandá, jè Nainá xi tíjna íjtòn nga ta jè tajngoò-né xi 'ñó tse nga'ñó tjín-la kò jè Orrè.

²³ Jè naxandá, mìkìl mochjeén-la jè ts'oi kò sá nga sùhiseèn-la. Nga jè sobà kjoa isén-la Nainá síhiseèn-la; kò jè Orrè ma ni'ín-la.

²⁴ Ngats'ìi jñà xitá naxandá ts'e isò'nde kinchima iseèn-né it'aà ts'e ni'ín-la. Kò jñà xitaxá íjtòn xi tjín isò'nde, kjikò kjoanchíná-la nga ya sùngatsja.

²⁵ Jñà xotjoa-la naxandá, mìkìl sìchjoàjto nga kjit'aà nachrjein; nga ya naxandá, mìkìl kojñò.

²⁶ Ngats'ìi naxandá kjoikò ngats'ìi kjoa nchíná-la kò ngats'ìi tsojmì xi 'ñó chjí-la nga ya sùngatsja.

²⁷ Ya ì'nde jè ñimé kjoahas'en xi tjé kjoàn xi ch'o s'ín kò xi kjoa ndiso. Tà jñà kjoahas'en xi tjít'aà 'ín-la jè xojòn-la Orrè xi ts'e kjoabinachon.

22

¹ Jè àkjale tsakó jngò-na xajngá nandá xi kijna tsjeè tsjeè, jè nandá xi bítsajnakon-ná nita mé nachrjein-ne. K'oas'ín tsjeè kji koni chitsín. Yaá tíbitjo ñánda síjna íxile-la Nainá nga tíhotíxoma ko yaá tíbitjo ñánda tíjna jè Orrè.

² Ya jngò osen ndiyá-la naxandá tífa nandá. Ko ya ngobà ngobà xajngá nandá, yaá síjna jè yá xi tsjá kjoabinachon nita mé nachrjein-ne. Tejó k'a ojà-la toò nga jngò nó. Jngò jngò k'a ojà-la toò nga ìjngò ìjngò sá. Jña xka-la, k'oaá s'ín mochjeén nga maxkii-la naxandá ts'e isò'nde.

³ Mì tí mé kjoa ch'o s'e-ne xi mikii sasén-la Nainá. Yaá sasíjna jè íxile-la Nainá ko ts'e Orrè nga kotíxoma. Ko ngats'ìi xita chí'nda-la, yaá sìxá-la.

⁴ Ngats'ìi xi xita-la ma, skoexkon-né kó kji isén-la Nainá; ko jè 'ín-la Nainá yaá sít'aà itjòn tjen-la.

⁵ Ya ì'nde jè, mì ti kojñò-ne. Jña xita xi ya títsajna, mì ti ní'ín kochjeén-la xi sìhiseèn-la, tíkoaá mì tí ts'oi kochjeén-la; nga jè sobá Na'èn-ná xi Nainá sìhiseèn-la. Jña xita kotíxoma nita mé nachrjein-ne.

Jyeé nchrobá machraña nga kjoí ìjngò k'a Cristo

⁶ Jè àkjale kitsò-na:

—'Én koi, nguì k'oaá s'ín tjín nga kítasòn; nguì 'én kixi-né. Jè Na'èn-ná xi Nainá xi síkíchiya-la jña xita xi chja ngajo-la, koií xá kisikasén-ne àkjale-la nga kòkò-la xi chí'nda-la ma jña kjoa xi ta nitoón okoma.

⁷ —Tín'ya-ná. 'An, kjoí nitoón ìjngò k'a.

Mé tà ndaà-la jñà xi síkitasòn jñà 'én xi kitsjaà Nainá koni s'ín tíchja xojon jè.

⁸ 'An-ná xi 'mì-na Juan, 'aán ki'nchrè koa kijtseè kjoa koi. K'e nga jye ki'nchrè koa jye kijtseè, tsohósijna-xkó'nchi-niñiat'aà-la jè àkjale xi tíhokó-na kjoa koi, nga mejèn-na skoexkoán.

⁹ Tanga jè àkjale kitsò-na:

—Kì k'oaá 'nì. Jè Nainá jchaxkoín. 'An, tikoáa chí'nda-la Nainá ma, koni ngaji, ko xita xinguii xi chja ngajo-la Nainá, ko ngats'iì xita xi síkitasòn 'én xi tíjt'aà xojon jè.

¹⁰ K'oaá tìs'ín kitsò-na:

—Kì bìjna'ma jñà 'én xi Nainá kitsjaà xi tíjt'aà xojon jè, nga jyeé nchrobá machraña nachrjein nga kítasòn.

¹¹ Jñà xita xi mìtsà kixi títsajna nguixkon Nainá nga ch'o s'ín, ta k'oaá s'ín kàtìtsajna. Ko jñà xi tíjn-la kjoakixi ko tsjeè títsajna nga nguixkon Nainá, k'oaá tìs'ín kàtasíkitasòn xi kjoakixi ko kjoatsjeè.

¹² —Tíná'ya, 'an, kjoíi nitoón ìjngoò k'a. Yáa kjoikoaa chí-la xi tsjaà-la xita koni s'ín kis'iin nga ìjngoò ìjngoò.

¹³ 'An-ná xi tìjna ítjoàn skanda tàts'en-la kjoa ko skanda fehet'aà-ne. 'An-ná xi tsibìts'iaa ko xi sikjehet'aà-na kjoa. 'An-ná xi tìjna ítjoàn ko xi fehet'aà-ne.

¹⁴ Mé ta ndaà-la jñà xita xi [jní-la Orrè] sítsjeè-ne nikje-la mé-ne nga tjò'nde-la nga skine toò-la yá xi tsjá kjoabinachon, tikoá koma kjoahas'en xotjoa-la jè naxandá.

¹⁵ Tanga ndìtsiaán kítsajna, ngats'iì jñà xita xi ch'o s'ín, ko jñà xi xita tj'e, ko jñà xi kjoa chíjngui

s'ín, kò jǎ̀nà xì xítà sík'en, kò jǎ̀nà xì xkósòn beèxkón kò ngats'ìì xì tsjakeè kjoa ndiso nga 'én ndiso chja.

¹⁶ —'An xì 'mì-na Jesús, 'aán kisikasén-nò àkjalè-nà nga tsjá-nò 'én it'aà ts'e kjoa koi, jǎ̀nò xì xítà naxandá-nà ma. 'An-ná jè jts'én xì itjot'aà-ne tje-là xítaxá ítjòn xì kì'mì David. 'An-ná ni'ño tse xì 'ño ote kji xì bitjokàtji k'e nga tajǎ̀nya.

¹⁷ Jè Inima Tsjeè-là Nainá kò chjoón-là Orrè, tsò-né:

—Nchroboí [Nà'èn Jesús].

Jǎ̀nà xì nchi'nchré, k'oáá tì kàtatsò:

—Nchroboí [Nà'èn Jesús].

Jǎ̀nà xì xíndá-là kò xì mejèn-là nandá, kàtjanchrobá, kàt'ìì kǎ̀tjò nandá xì tsjá kjoabinachon.

¹⁸ 'An, k'oáá xan-nò, ngats'ioò xì na'yà-là jǎ̀nà 'én xì kitsjaà Nainá xì tjít'aà xojoñ jè: Tsà yá xì kǎ̀t'aàsòn kjoa xì tjít'aà xojoñ jè, Nainá k'oáá tìs'ín tsjásòn-là kǎ̀t'in koni s'ín tjít'aà xojoñ jè.

¹⁹ Tsà yá xì kjoááxìn jngoò-là 'én xì kitsjaà Nainá xì tjít'aà xojoñ jè, Nainá, tìk'oáá kjoááxìn kǎ̀ndaà xì tjí'nde-là nga skine toò-là yá xì tsjá kjoabinachon kò mìkìì tsjá'nde-là nga yá kítsajna naxandá tsjeè-là Nainá koni s'ín tjít'aà xojoñ jè.

²⁰ Jè xì bénojmí kjoa koi, k'oáá tsò:

—Jon, kjoì nitoón ìjngoò k'a.

K'oáá s'ín kàtama. ¡Nchroboí Nà'èn Jesús!

²¹ Kǎ̀ndaà-là Nà'èn-ná Jesucristo kàtjnakò-nó ngats'ioò. K'oáá s'ín kàtama.

Mazatec, San Jerónimo Tecóatl
New Testament in Mazatec, San Jerónimo Tecóatl
Mazateco de S Jeronimo Tecoaatl; maa
(MX:maa:Mazatec, San Jerónimo Tecóatl)

copyright © 2012 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Contributor: Bible League International

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2012 Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-05-10

PDF generated using Haiola and XeLaTeX on 10 May 2025 from source files dated 10 May 2025

9f778253-d34e-5037-af35-7bca16479aa0